

# Saveeŋ To Timbooda Ila To Yes Hibrua

## Hibru

---

### Maaron Natu to ipatoonŋ ghiit pa Tama Maaron

**1** <sup>1</sup>Muunŋ, Maaron isavia aliŋa pa propet toni pae katindi ila ataam naol naol. Tauto tigham avo, ve tivotia aliŋa pa nditimbud. <sup>2</sup>Eemoghon aazne, taneep ila sawa paghu to Maaron ighaze ipasob uraat toni. Tovenen sawa tonene, iit taloonŋ Maaron aliŋa ila tau Natu avo. Sawa to Maaron ighur sambam ve taan toman mbep to naol, ye ighur di tivot ila Natu tonowen nima. Ve ye ighaze ighur mbep naol tonowen tisob tinim Natu le, lesu iŋgin di.<sup>a</sup>  
<sup>3</sup>Ye to inim ghazoonŋa pait ve isul ghiit, ve ipatoonŋ ghiit pa Tama Maaron tapiri ve poia toni. Ye igham Tama Maaron nagho kat. Maaron tapiri ve ŋgar isob to ineep toni, nene ineep to Natu paam. Natu saveeŋ toni, nene tapiri tiina kat, ve ikis mbep tisob tineep tunŋia. Ye imaat ve ireu sosor toit, ve igham ghiit taŋgalaanŋ ila Maaron mata. Ghoru imuul iza ila pa sambam, ve mbole izi ila pa Maaron arianaŋ tau nima waan.<sup>b</sup>

### Maaron Natu ilib pa yes aŋela

<sup>4</sup>Tovenen Maaron Natu ilib kat pa yes aŋela. Pasa, iza to Maaron igham pani, nene tiina ve poia kat ilib pa yes aŋela izadi.<sup>c</sup>

<sup>5</sup>Aghita. Maaron isaav pa Natu ighaze:

“Aazne, you nasaav ghazoonŋa tovene: You natug yom. Yom tamam to you. Aazne, you naghur ghom pa uraat.”<sup>d</sup>

Ve isaav muul ighaze:

“Ye tama you, ve ye you natug.”<sup>e</sup>

Maaron isavia saveeŋ tovene pa aŋela eta maau. Saveeŋ tonene iŋarua Natu moghon.

---

**a** 1:2 Mt 11:27; Yo 1:3; Kol 1:16; Hib 12:25    **b** 1:3 Yo 1:14; Mk 16:19; Kol 1:15+  
**c** 1:4 Pil 2:9+    **d** 1:5 Mbo 2:7; Mt 3:17; Hib 5:5    **e** 1:5 2Sam 7:14

<sup>6</sup>Ve sawa to Maaron ighaze imbaañ Natu aidaba izi inim taan, ye isaav tovene:

“Añela tisob to Maaron irau tiput aghedi pani, ve tipaiti.”<sup>f</sup>

<sup>7</sup>Ve yes añela, Maaron isavia di ighaze:

“Añela, yes uraata toni to timbesmbees pani. Ye igham di tinimale yaghur ve yab yama.”<sup>g</sup>

<sup>8</sup>Eemoghon ye isavia Natu ighaze:

“Maaron, pooz tiom irau isob ne maau. Uneep ila inam to ghamuuj pooz itaghoni taghoni gha ila.

Ŋgar denja to inim ghilalooj pa pooz tiom.

<sup>9</sup> Yom lolom pa ŋgar denja, ve ughur koi pa ŋgar samsamia to tiyel pa tutuuj.

Tovenen Maaron tiom ipait ghom le ulib pa nditam pida, ve ilij ŋgoreej izala poghom pa ighur ghom unum kinik.

Tauto igham ghom lolom poia le poia kat.”<sup>h</sup>

<sup>10</sup>Ve saveej waaro ite to ijarua Maaron Natu, nene isaav tovene:

“Tiina, muuj kat yom ughur taan, ve ugharaat pughu le iyaryaaj.

Ve sambam paroñania paam, nene nimam muri.

<sup>11-12</sup> Sambam paroñania ve taan pale tisami tinimale uli to muñginaaj ve imarepreep.

Tovenen yom pale uloi di inimale nonogiiña muñgina, ve urabolin di pa sambam paroñania paghu ve taan paghu.

Eemoghon yom, ghoru unepneep moghon tovene. Sawa tiom irau isob maau. Iseñseñga itaghoni taghoni gha ila.”<sup>i</sup>

<sup>13</sup>Ve muuj, Maaron isaav pa Natu ighaze:

“Unum mbolem izi ila pa nimag waan, le irau natatan koiamña ve tapiridi isob kat, ve uvazag di ila aghem samba.”<sup>j</sup>

Aghita. Sawa eta ye isaav tovene pa añela eta? Maau. Saveej tonene ijarua Natu moghon. <sup>14</sup>Pasa, añela, yes mbesooña to Maaron. Ye imbanñaaj di pa tiuul yes to ye ighaze igham mulin di.<sup>k</sup>

### Taghur muriid pa Ulaaña toit Krisi malep

**2** <sup>1</sup>Tovenen Maaron aliña to talooña, iit irau mataad kisini ve tataghoni kat. Pa vene, tapul Maaron tanimale waaj to wajaar igherebi ve imoghan ilale. <sup>2</sup>Aghita. Maaron aliña to muuj yes Israela tilooña ila yes añela avodi, nene onoon ve ineep tunja. Tamtoghon tisob to titaghoni maau ve timalaaj pani, Maaron ighurghur di maau. Yes tisob tigham atia denja itaghon sosor todi. <sup>3</sup>Ve uraat to Yesu ighami pa igham

f 1:6 Mbo 97:7 g 1:7 Mbo 104:4 h 1:9 Mbo 45:6+ i 1:11-12 Mbo 102:25+; Hib 13:8; Yems 1:17; 2Pe 3:13 j 1:13 Mbo 110:1; Mk 12:36 k 1:14 Mbo 34:7, 91:11, 103:20; Mbañ 12:7

mulin ghiit, nene tiina le tiina kat. Tovenen ighaze lolood imaagh ve tapul ngar pani, pale tapaghau tauud pa Maaron mbalmbali toni vena? Maau.<sup>l</sup>

Uraat tonenen, Tiina toit Yesu ivotia muuj. Ghoru yes to tilooj saveej ila toni, anadi tipalot saveeja pait.<sup>m</sup>

<sup>4</sup>Ve Maaron ipariaaŋ saveej tonenen paam. Pasa, irei uraat ve tapiri naol to Avuvu Patabuaŋ pa tamtoghon toni itaghon tau lolo. Ve ipalot di ve tigham uraat tintina ve mbeg gharatooŋadi naol naol to tipatooŋ di tighaze ye ineev toman di pa uraat todi.<sup>n</sup>

### Maaron itatan Yesu iza, ve muri ghoru igham iza ivot inim tiina muul

<sup>5</sup>Sambam paghu ve taan paghu to nisavia ne, Maaron ighur yes aŋela pa tiŋgin di maau. <sup>6</sup>Pasa, Maaron aliŋa waaro eez to ŋgeu eez ivotia, isaav ighaze:<sup>o</sup>

“Maaron, yei tamtoghon to taan ninim sa mbeg poia, to yom matam iŋgalŋgal ghei?

Yei tamtoghon ndinatudi, pughu vena to yom matam payei?<sup>p</sup>

<sup>7</sup> Yom ughur ghei ve ugham ghei nizi ris moghon pa yes aŋela. Ve upait ghei, ve ugham izamai ivot inim tiina.

<sup>8</sup> Ve ughur mbeg tisob tineep ila sambamai, leso niŋgin di.”

Sawa to Maaron ighur mbeg tineep ila iit tamtoghon sambaad, ye iŋguruut mbeg eta maau. Ighur mbeg tisob tineep ila sambaad. Onoon aazne, taghita anoŋa sone. Pasa, mbeg tisob tineep ila iit tamtoghon sambaad sone.<sup>q</sup>

<sup>9</sup>Eemoghon Yesu, ghoru iit taghita. Ye iparab ariana le ilib. Tauto aazne, Maaron ipakuri, ve igham iza ivot inim tiina kat. Sawa tuku to Yesu ineev izi taan, Maaron itatan iza ve ighuri izi ris pa yes aŋela. Pasa, ye ighaze igham poian ghiit ve igham mulin ghiit pa mateej. Tauto Yesu igham iit tasob inaad, ve igham yabyabuuj tiina, ve imaat.<sup>r</sup>

### Yesu irau iuul ghiit pasa, ye tamtoghon inimale iit

<sup>10</sup>Maaron inim pughu pa mbeg to naol ne, ve ighur mbeg tisob tivot pa tau. Ye ighaze igham tamtoghon katindi tinim ndinatu, ve igham di tila tineep tomani ila ŋguruba lolo izi sambam. Tauto igham Natu Yesu iyamaan yabyabuuj tiina. Ŋgar toni tonene denja. Pasa, yabyabuuj

---

**l** 2:3 Hib 10:28+, 12:25 **m** 2:3 Mk 1:14+; Mbaŋ 1:8; 1Yo 1:1+ **n** 2:4 Mk 16:20+; Mbaŋ 14:3; 1Kor 12:4-11 **o** 2:6 Saveej to ineev ila rau to mbouj, isavia iit tamtoghon to taan. Eemoghon ŋgeu to imbood saveej to Buk Hibru, ye igham ŋgar ighaze saveej tonene denja kat pa Yesu. Pasa, ye iza tiina kat. Ilib pa yes aŋela. Eemoghon sawa to izi inim taan, ye itatan tau iza. Ve sawa to imuul iza ila pa sambam, ye igham iza tiina kat, ve Maaron ighur mbeg tisob tila nima, leso iŋgin di. **p** 2:6 Mbo 8:4+, 144:3 **q** 2:8 Mt 28:18; 1Kor 15:25+; Ep 1:22 **r** 2:9 Pil 2:7+; 1Yo 2:2; Syg 5:9

to Yesu ighami, tauto ighami inim volaŋa poia eez. Ye irau imuun pa Maaron ndinatu, ve iparab padi, leso igham mulin di.<sup>s</sup>

<sup>11</sup> Yesu toman yes to ye igham di tinim tamtoŋhon patabuaŋa to Maaron, lupuun todi ee moghon. Tauto maya pa iwaat di toŋvetaz toni maau.<sup>t</sup>

<sup>12</sup> Aghita. Ye isaav pa Maaron ighaze:

“You pale navotia izam ve ŋgar tiom pa toŋvetaz tiou.

Ve ighaze tamtoŋhon tiom tilup di pa suŋuun, you pale nala toman di, ve nambou pa napait izam.”<sup>u</sup>

<sup>13</sup> Ve ye isaav muul ighaze:

“You pale nanumeer Maaron.”<sup>v</sup>

Ve isavia saveeŋ ite ighaze:

“Ughita. You taug tonene. Yeiŋa ndipain to Maaron igham di payou, tauto ninepneep.”<sup>w</sup>

<sup>14</sup> Ndipain to ye isavia di, nene iit tamtoŋhon to taan to taghur ila toni. Tauto Yesu paam inim tamtoŋhon to taan raraate inimale iit, ve iyamaan pataŋani naol to taan ve imaat, leso ipasob Ŋgeu Samia tapiri. Pasa, ye to inim pughu pa mateeŋ ve iwaghamun tamtoŋhon.<sup>x</sup>

<sup>15</sup> Sawa isob to taneep izi taan, iit tanim mbesooŋa pa mateeŋ. Pasa tamatughez pani, ve matughezaŋ tonene ikis ghiit ariana. Eemoghon mateeŋ to Yesu, nene ipas ghiit pa pataŋani tonene wa. <sup>16</sup> Iit tawatag: Yesu inim pa iuul yes aŋela maau. Ye inim pa iuul iit papaghu to Abaram.<sup>y</sup>

<sup>17</sup> Pughu tonene to ye ighita ighaze ye izi inim taan ve inim tamtoŋhon raraate inimale iit toŋvetaz toni pa mbep to naol ne, ghoru poia. Leso inim daba to watoonrau to lolo isamin ghiit, ve igham poian uraat to Maaron ighuri ila nima, ve ireu sosor toit, ve itatan mbalmbali to Maaron.<sup>z</sup>

<sup>18</sup> Ye iyamaan tovaan ve pataŋani naol to taan wa. Tauto ye iraua kat pa iuul yes to tovaan igham di.<sup>a</sup>

### Yesu iza tiina ilib pa Mose

**3** <sup>1</sup> Yam toŋvetaz, poiŋ to ndug sambam igham gham anim Maaron tamtoŋhon toni patabuaŋa wa. Tovenen matamim iŋgal pooi pa Yesu. Iit taghur ila toni, ve tavovotia varu taghaze ye mbaŋooŋa to Maaron, ve daba tau to watoonrau.<sup>b</sup>

<sup>2</sup> Uraat to Maaron ighuri ila nima, ye ighami itaghon katin Maaron ŋgar toni, inimale muun Mose igham katin uraat to Maaron ighuri ila nima,

s 2:10 Ro 11:36; Hib 5:8+ t 2:11 Mk 3:35; Hib 10:10 u 2:12 Mbo 22:22

v 2:13 Mbo 18:2 w 2:13 Is 8:18; Yo 17:6,9+ x 2:14 Mbnp 3:1+; Yo 1:14, 12:31;

2Tim 1:10 y 2:16 Ga 3:7,29 z 2:17 Pil 2:7; Hib 2:11, 3:1 a 2:18 Mt 4:1+; Hib 4:15

b 3:1 Hib 2:17, 4:14+, 12:2

ve iŋgin poian Maaron ruum toni. Ruum tonowen, nene yes Israela to Maaron igham di tinim le.<sup>c</sup>

<sup>3</sup>Iit tawatag: Ighaze ŋgeu eta irei ruum poia eta, nene pale tamtoghon tipait ruum tonenen. Eemoghon ŋgeu to irei ruum, ghoru tipaiti kat. Nene raraate inimale Mose ve Yesu. Yesu iza ilib pa Mose pasa, Mose ye inimale ruum moghon. Ve Yesu, ye inimale ŋgeu to irei ruum. <sup>4</sup>Ruum to naol ne, tamtoghon tirei di. Eemoghon Maaron to ighur mbep tisob tivot.<sup>d</sup>

<sup>5</sup>Mose, ye mbesooŋa to Maaron ve igham katin uraat naol pa ruum to Maaron itaghon Maaron ŋgar toni. Ve ye isavia mbep pida to muri Maaron ivotia di tivot tighazooŋ. <sup>6</sup>Eemoghon Krisi, ye Maaron Natu to iŋgin poian ruum to Maaron itaghon Maaron ŋgar toni. Ve ighaze tamatughez maau, ve takis ghurla toit tunja, ve taghur mataad pa nepooŋ poia to Maaron pale igham pait, ve tiniid iza pani, nene pale tapatoŋ tauud taghaze iit ruum to Maaron.<sup>e</sup>

**Tamtoghon to tizorzoor Maaron aliŋa, ye irau igham di atedi izi maau**

<sup>7-8</sup>Tovenen alooŋ saveeŋ to Avuvu Patabuaŋ ivotia pait. Ighaze: “Aazne, ighaze yam alooŋ Maaron aliŋa, apoon lolomim pani malep.

Ve atoov Maaron ve azoora inimale muuŋ nditimumim tighami izi ndug balim malep.

<sup>9</sup> Ndaman tamoot ru to tineep izi ndug balim, you naghama uraat tintina ila lolodi, ve tighita pa taudi matadi.

Eemoghon tighur inim tiou maau, ve tinoknok tovaŋ ghou.

<sup>10</sup> Tauto tigham ghou ateg yabyab kat, ve nasaav padi naghaze: ‘Ndiran tonowen lolodi pa titaghon ataam tiou maau. Moghon moghon tiyel pa ataam tiou.’

<sup>11</sup> Tauto nasaav ariana padi toman ateg yabyab, ve napariaaŋ saveeŋ tiou naghaze:

‘Onoon kat. Ndug to naghaze atedi izi pani, yes irau tilooŋ tila pani maau. Maau le maau kat!’<sup>f</sup>

<sup>12</sup>Tovenen yam toŋvetaz, apatum gham: Pa vene ŋgar samia ighereb tiam eta, ghoru ipul ghurla toni, ve ipul muri pa Maaron mata yaryaara. <sup>13</sup>Ndag to naol ne, yam irau awapalotin gham pa ŋgar poia. Pa vene, ŋgar samia itombaan tiam eta, ghoru ipoon lolo, ve irau ighilaal Maaron muul maau. Uraat to palotiŋ tonenen, asakia ila sawa ite paam malep. Aghami to aazne.<sup>g</sup>

c 3:2 Nam 12:7 d 3:4 Mbnp 1:1+ e 3:6 1Kor 3:16; 2Kor 6:16; Hib 6:11  
f 3:11 Nam 14:21+; Mbo 95:7+; Mt 4:7 g 3:13 1Tes 5:11,14; Hib 10:24+

<sup>14</sup>Sawa to taghur ila to Krisi muuŋ, taghur ila toni ariana. Iit irau tikis ghurla toit tuŋia tovene le sawa toit isob. Leso tapatoon tauud taghaze iit itaad ite Krisi ve talup tomani.<sup>h</sup>

<sup>15</sup>Saveeŋa, Maaron isavia muuŋ wa. Ighaze:

“Aazne, ighaze yam aloon Maaron aliŋa, apoon lolomim pani animale nditimbumim to muuŋ tizoor Maaron aliŋa izi ndug balim ne malep.”<sup>i</sup>

<sup>16</sup>Laak, sei masin to tiloon Maaron aliŋa ve tizoora? Nene yes ival tiina to Israel to Mose imuŋ padi ve igham di tipul Isip ve tila. <sup>17</sup>Ve sei masin to Maaron ate yabyab padi irau ndaman tamoot ru? Nene yes Israela to tinoknok ghamuŋ sosor. Tauto Maaron irab di timatmaat ve patudi tiwaghengheen izi ndug balim.<sup>j</sup>

<sup>18</sup>Ve sei masin to Maaron isaav ariana padi, ve ipariaaŋ saveeŋ toni ighaze ndug to ye ighaze atedi izi pani, yes irau tiloon tila maau? Saveeŋ tonenen iŋarua yes to tizoor ye aliŋa. <sup>19</sup>Saveeŋ naol tonene ipatoon ghiit ighaze yes Israela tighur ila maau, tauto yes irau tiloon tila ndug to Maaron ighaze atedi izi pani ne maau.<sup>k</sup>

**Maaron imbua saveeŋ toman tamtoghon toni ighaze ye pale igham di atedi izi**

**4** <sup>1</sup>Tovenen Maaron imbua saveeŋ toman tamtoghon toni ighaze ye pale igham di atedi izi.<sup>l</sup>

Ve saveeŋ mbuaaŋ tonowen inepneep sone. Tovenen iit irau tamatughez ve mataad iŋgal tauud pooi. Pasa, ighaze tiam eta itaghon ataam to Krisi ila, eemoghon ipasob laghoon toni maau, ve imuul izi ataam luvuŋa moghon, nene pale irau ighita saveeŋ mbuaaŋ tonenen anoŋa maau.<sup>m</sup>

<sup>2</sup>Onoon, tivotia varu poia pait ve taloon wa, inimale muuŋ ival tiina to Israel tiloon Maaron aliŋa. Eemoghon saveeŋ tonowen iuul di maau. Pasa, sawa to tiloon, tighur ila maau. <sup>3</sup>Aazne, iit tamtoghon to taghur ila to Krisi, tauto ye igham ghiit ateed izi. Ve yes to tighur ila maau ne, irau atedi izi maau. Pasa, Maaron isaav ighaze:<sup>n</sup>

“You nasaav ariana padi toman ateg yabyab, ve napariaaŋ saveeŋ tiou naghaze:

‘Onoon kat. Ndug to naghaze atedi izi pani, yes irau tiloon tila maau. Maau le maau kat!’ ”<sup>o</sup>

**h 3:14** 1Kor 15:2; Hib 6:11, 10:35; Syg 2:25 **i 3:15** Mbo 95:7+; Hib 4:7

**j 3:17** Nam 14:1-35; 1Kor 10:1+ **k 3:19** Yo 3:36; Hib 4:6 **l 4:1** Nepoon to ateed izi to Maaron igham pa tamtoghon toni, nene ŋgara tol. 1) Muuŋ, Maaron igham yes Israela tiloon tila taan Kanaan, lesa tigham taan tonowen inim ledi ve tineep pooi. 2) Aazne, Krisi igham ghiit ateed izi pasa, iit irau tanumeer uraat ve poia toni pa igham ghiit taneep denjaad ila Maaron mata. 3) Muri, Maaron pale igham tamtoghon toni tila ndug sambam, lesa atedi izi ve tineep pooi. **m 4:1** Hib 3:14 **n 4:3** Mt 11:28 **o 4:3** Mbo 95:11; Hib 3:11

Eemoghon sawa to ye igham ghiit ateed izi, nene inepneep sone. Pasa, muuŋ kat, sawa to Maaron ighur sambam ve taan, ye ipasob uraat toni le isob. Ve aazne, ye inamnaam ghiit. <sup>4</sup>Aghita. Saveeŋ toni waaro eez isaav ighaze: “Sawa inim liim ve ru, ghoru Maaron ate izi pa uraat toni to naol ne.”<sup>p</sup>

<sup>5</sup>Ve saveeŋ waaro ite isaav tovene:

“Ndug to naghaze atedi izi pani, yes irau tilooŋ tila maau.”<sup>q</sup>

<sup>6</sup>Tovenen saveeŋ mbuaaŋ to Maaron to isaav ighaze ye pale igham tamtoŋhon toni atedi izi, nene inepneep sone. Ve tamtoŋhon pida pale tighita saveeŋ tonenen anoŋa. Eemoghon yes to tilooŋ mbeb tonenen varu muuŋ, tighita anoŋa maau. Pasa, tizoor Maaron aliŋa. <sup>7</sup>Tauto Maaron ighur sawa ite pa igham tamtoŋhon toni atedi izi kat. Sawa tonenen, tauto aazne taza pani wa. Aghita. Ndaman katindi inim ila, ve muri ghoru, Maaron ivotia nepooŋ tonenen saveeŋa ila David avo ighaze:

“Aazne, ighaze yam alooŋ Maaron aliŋa, apoon lolomim pani malep.”<sup>r</sup>

<sup>8</sup>Onoon, Yosua igham yes Israela tilooŋ tila taan Kanaan. Eemoghon ye igham di atedi izi kat maau. Pasa, animale ye igham di atedi izi kat, tone irau Maaron isavia sawa ite paam to igham tamtoŋhon atedi izi ne maau.<sup>s</sup>

<sup>9</sup>Tovenen nepooŋ to Maaron igham tamtoŋhon toni atedi izi kat animale nepooŋ to umbom patabuaŋ, nene inepneep sone. <sup>10</sup>Ighaze Maaron igham tamtoŋhon eta ate izi, nene pale uraat toni isob, ve ate izi kat, animale Maaron ighur sambam ve taan le isob, ghoru ate izi.<sup>t</sup>

<sup>11</sup>Tovenen iit irau tazuarua ghiit kat le taneep ateed izi itaghon Maaron ŋgar toni. Pa vene, toit eta izoor Maaron animale yes Israela, ghoru itap pa ghurla toni, ve irau igham nepooŋ tonowen maau.

### Saveeŋ to Maaron, mata kat

<sup>12</sup>Maaron aliŋa, nene saveeŋ mata yaryaara, ve ighamgham uraat toman tapiri tiina. Ve saveeŋ toni, mata kat. Ilib pa buza to mata ru. Tauto iŋgalŋgal katin lolood, ve ipatoŋŋ ŋgar to inep ila lolood ne ivot ighazooŋ. Leso taghilaal ŋgar sine to ivot ila to Maaron Avuvu, ve ŋgar sine to ivot ila tauud ŋgar toit moghon.<sup>u</sup>

<sup>13</sup>Maaron, ye mata mala. Mbeb to ye ighur di, eta iyooŋ pani maau. Mbeb ŋgozaaŋ tisob tineep tighazooŋ ila mata. Ve iit tasob pale tayoon ila ye mata, lesu tavotia ŋgar to tagham di ne ila toni, ve iŋgabiiz ghiit.<sup>v</sup>

### Yesu, ye daba tau to watoŋrau

<sup>14</sup>Tovenen ghurla toit to tavovotia ne, takisi tunja. Pasa, iit leed daba tiina eez to watoŋrau. Nene Yesu. Ye Maaron tau Natu. Ye malmali iza

---

p 4:4 Mbnp 2:2+ q 4:5 Mbo 95:11 r 4:7 Mbo 95:7+ s 4:8 Yos 22:4 t 4:10 Syg 14:13  
u 4:12 Ep 6:17; Syg 1:16 v 4:13 Mbo 33:13+, 139:1+; 2Kor 5:10

ila le ila peria to Maaron to sambam we, lesu igham avood ve isavia saveeŋ toit ila toni.<sup>w</sup>

<sup>15</sup>Onoon, iit tamtoghon tapiriid imbool. Eemoghon daba toit to watoonrau tonene, ye lolo isasamin ghiit. Pasa, tovaanŋ tisob to tivotvot pait ne, tivot pani paam, ve ye iwataŋ di wa. Eemoghon ye igham sosor eta maau.<sup>x</sup>

<sup>16</sup>Tovenen iit tamatughez pa tala tagharau Maaron malep. Taghur suŋuun toit injarua ina to ghamuunŋ pooz irau sawa isob. Pasa poia toni, nene tiina le tiina kat. Tovenen sawa to pataŋani igham ghiit, ye pale lolo isamin ghiit, ve iuul ghiit itaghon tau poia toni.<sup>y</sup>

### Krisi, ye ngeu to watoonrau animale Melkizedek

**5** <sup>1</sup>Daba tisob to watoonrau, Maaron ipas di ila tamtoghon lolodi, ve ighur di pa uraat. Lesu tigham tamtoghon naghodi, ve tigham uraat pa watoonrau todi ila ye mata. Yes tighurghur paitoonŋ to tamtoghon tila pa Maaron, ve tighamgham uraat pa watoonrau todi, lesu Maaron ireu sosor todi.<sup>z</sup>

<sup>2</sup>Yes to tikankan pa Maaron aliŋa ve tiyel pa ataam toni, daba to watoonrau irau tigham ariana padi maau. Tisasavia saveeŋ luuma padi. Pasa, tiwataŋ: Yes paam tapiriid imbool, ve tighamgham sosor. <sup>3</sup>Pughu tonene to daba to watoonrau irau igham watoonrau pa ireu tau sosor toni muunŋ. Le isob, ghoru igham pa sosor to tamtoghon pida.<sup>a</sup>

<sup>4</sup>Daba to watoonrau, ye iza tiina pa uraat toni. Ve ngeu eta irau idodon tau pa uraat tonene maau. Maaron tau irau ipoi, ve ighur uraat tonene ila nima animale muunŋ igham pa Aron. <sup>5</sup>Krisi tovene paam. Ye ipakur tau ve ighur tau inim daba to watoonrau maau. Maaron tau ighuri pa uraat tonene. Aghita. Muunŋ, ye isaav pani ighaze:

“You natug yom.

Yom tamam to you.

Aazne, you naghur ghom pa uraat.”<sup>b</sup>

<sup>6</sup>Ve saveeŋ toni waaro ite isaav ighaze:

“Yom ngeu to watoonrau animale Melkizedek. Ve yom pale ineeŋ tovene itaghoni taghoni gha ila.”<sup>c</sup>

<sup>7</sup>Sawa to Yesu inim tamtoghon ve ineeŋ izi taan, ye isuŋ pa Maaron ighaze iuuli, ve itaŋ rorani toman aliŋa tiina ve mata suru izi. Pasa, ye iwataŋ: Maaron irau igham mulini pa mateeŋ. Ve Maaron iloonŋ suŋuun toni. Pasa, ye iroron pa Maaron ve ineeŋ ila samba.<sup>d</sup>

w 4:14 Hib 3:1, 6:11, 10:35+ x 4:15 Mt 4:1+; 2Kor 5:21; Hib 2:17; 1Pe 2:22; 1Yo 3:5  
y 4:16 Ep 3:12; Hib 10:19+ z 5:1 Hib 8:3 a 5:3 Hib 7:27, 9:7 b 5:5 Mbo 2:7; Mt 3:17;  
Hib 1:5 c 5:6 Mbnp 14:18+; Mbo 110:4; Hib 6:20 d 5:7 Mk 14:35, 15:34+; Yo 12:27;  
Pil 2:8+



<sup>8</sup>Onoon, ye Maaron tau Natu. Eemoghon patanani naol to ye imbaad di, tauto igham ngar toni ighazoonj kat pa ngar to taghoniij Maaron aliņa. <sup>9-10</sup>Ve ighami iraua kat pa igham uraat to watoonjrau. Tauto Maaron isaav pani ighaze ye ighuri inim daba to watoonjrau inimale Melkizedek. Tovenen tamtoghon to tilooj aliņa ve titaghoni, ye pale igham mulin di tisob, ve tineep pooi itaghoni taghoni gha ila.<sup>e</sup>

### Tagham ngar inimale ndipain geegeu malep

<sup>11</sup>Lemai saveej naol to nighaze nasavia pa Yesu ve uraat toni. Eemoghon ighaze nila lolo pa saveej tonene, pale ipatanan payam. Pasa, saveej to yam alonjlooj, ngar tiam ivot pani rikia maau. <sup>12</sup>Aghita. Yam agham Maaron saveej toni muuj wa. Tovenen naghaze pa yam apatoot tamtoghon pida pani wa. Eemoghon maau. Yam animale yes to papaghudi pa tigham Maaron saveej toni. Yam animale ndipain geegeu to tighunghun tuz sone. Irau aghan aniij ariņa maau.<sup>f</sup>

<sup>13</sup>Tamtoghon to tighunghun tuz moghon, ngar todi inimale ndipain geegeu. Pasa, ngar to denja ila Maaron mata, yes tighazoonj pani sone. <sup>14</sup>Ve aniij ariņa, nene to yes to ngar todi imatu wa. Ndiran tovene, mos to Maaron ipatooj di le ngar todi ivot wa. Tauto yes irau tighilal ngar sine to poia, ve ngar sine to samia.<sup>g</sup>

**6** <sup>1-2</sup>Sawa to talooj saveej to Krisi inim paghu, tipatoot ghiit pa ngar raurau muuj. Ngar tovene: Ngar to pale igham ghiit tamaat ve talaleed, iit irau tapuli ineep, tator ngar toit, ve taghur ila to Krisi. Ve tipatoot ghiit pa ngar naol to ghamuuj ya,<sup>h</sup> ve ngar to ghuruuj nimaad izala tamtoghon poghodi pa tapalot di, ve mundigiij to yes mateeņa. Ve tipatoot ghiit tighaze Maaron pale ingabiiz ghiit ve ighur atia pait. Ve atia tonowen pale ineep le alok. Ngar tovene to tipatoot ghiit pani muuj, ghoru tisavia ngar pida. Nene poia. Eemoghon ighaze tasesavia ngar tovene moghon, nene inimale iit taghelia gungun moghon, ve tarei ruum anoņa maau. Tovenen iit irau tazuarua ghiit le taghazoonj pa ngar pida paam, lesu ngar toit imatu pa Maaron saveej toni. <sup>3</sup>Ve ighaze Maaron iyok pait, nene pale tagham tovene.

### Yes to tighur muridi pa Krisi, ledi ataam muul maau

<sup>4</sup>Aghita. Ighaze tamtoghon eta ipul muri pa Krisi, nene pale iit leed ataam eta pa taghami itoor ngar toni imuul ila pa Krisi ne maau.

---

**e 5:9-10** Hib 2:10,17, 5:6, 7:1+ **f 5:12** 1Kor 3:1+ **g 5:14** Ro 16:19; Ep 4:14; Pil 1:10  
**h 6:1-2** Muuj, tamtoghon tigham ya pa pughu naol. Ighaze tamtoghon eta to Yuda maau ne, ighaze itoor ngar toni ve itaghon yes Yuda pa sujuuj todi, ye igham ya. Ve ighaze tamtoghon eta ighaze itaghon ngar to Yoan ngeu rughuzaaņa, nene ye paam igham ya. Yes Yuda timenmen nimadi ve titaghon ataam naol pa ririwaan, lesu tingalaan ila Maaron mata. Ve Krisi tamtoghon toni tigham ya, lesu tila toman Krisi pa mateej toni, ve yesņa Krisi tilup di tinim ee moghon.

Tamtoghon pida, Maaron ipaghazonan di ve ngar todi ighazon wa. Ve Maaron Avuvu igham uraat padi, ve poia toni to inep sambam ve izi inim, yes tiyamaana wa. <sup>5</sup>Yes tigham saveen to Maaron, ve tiyamaana tighaze poia. Ve Maaron tapiri naol to muri pale tivot tighazon, yes tiyamaan di ris wa.<sup>i</sup>

<sup>6</sup>Tamtoghon tovene, ighaze tighur muridi pa Krisi, yes ledi ataam pa titoor ngar todi ve timuul tila toni ne maau. Pasa, ngar to tighami, nene inimale tirab Maaron Natu izala ai pambaroon muul, ve tipamayanini ila ival tiina matadi.<sup>j</sup>

<sup>7</sup>Taan to ighaze uman izizi pani ve aniiŋ popoia titubtub ila, nene iuul yes to tighanghan ila taan tonenen. Taan tovene, poia to Maaron pale inep ila. <sup>8</sup>Eemoghon taan to kikiliŋ samsamia toman waar mata mata moghon titubtub ila, nene taan poia maau. Taan tovene ipatumi. Pasa, ighaze inepneep tovene itaghoni ila, nene pale mala maau ve Maaron iwaghamuni, ve yab ighani.<sup>k</sup>

<sup>9</sup>Yam ndiran tiei, lolomai payam kat. Onoon, saveen to aazne nisavia payam ne, ariana ris. Eemoghon yei nighur ila ariana nighaze yam animale taan samia maau. Yam animale taan poia. Tovenen Maaron pale igham mulin gham ve aneep pooi. <sup>10</sup>Pasa, ye itaghon ngar denja moghon. Irau igham ngar samia eta maau. Tovenen ye irau lolo imaagh pa uraat tiam popoia ve ulaan to yam aghamgham pa tamtoghon toni ne maau. Aazne paam, yam auluul di. Ngar tonanan ipatoon gham ighaze lolomim inep toni kat.<sup>l</sup>

<sup>11</sup>Yei nighaze yam asob azuaria gham le ataghon katin ngar to Krisi. Tovenen lolomim ru malep. Akis ghurla tiam tunja le irau agham nepoon poia to aghurghur matamim pani ne. <sup>12</sup>Tovenen amalai malep. Matamim iyaryaar, ve ataghon ngar to yes to tighur ila to Maaron, tiyoon ariana pa badoon pataŋani, ve tisaŋan le tighita saveen mbuaan toni anoŋa.<sup>m</sup>

### Lolood ru pa saveen mbuaan to Maaron malep

<sup>13</sup>Sawa to Maaron imbua saveen toman Abaram, ye iwaat tau iza pa saveen mbuaan toni leso ipariaana. Pasa, tamtoghon eta iza ilib pa Maaron maau. Tauto iwaat tau iza pa saveen tonowen, leso ipariaana le iyaryaan kat ighaze:

<sup>14</sup>“Onoon kat. You taug pale naghur poia tiou tiina iza tiom, ve nagham papaghu tiom timasa tinim naol.”<sup>n</sup>

<sup>15</sup>Abaram ighur ila saveen mbuaan tonene. Tauto ate izi, ve inamnaam ila le ighita anoŋa.

---

i 6:5 Mbo 34:8 j 6:6 Hib 10:26+; 2Pe 2:20+; 1Yo 5:16 k 6:8 Mt 3:10, 7:19;  
Lu 13:6+ l 6:10 Mt 10:40+, 25:40; 1Kor 15:58 m 6:12 Hib 10:36, 12:1; Yems 1:3+  
n 6:14 Mbnp 22:16+

<sup>16</sup>Iit tamtoghon gabuaad tovene: Ighaze itiŋa ndiran pida tawazoran ghiit pa mbef eta, nene pale tawaat tamtoghon eta to iza tiina ilib pait. Leso iza tonowen ipariaaŋ saveeŋ toit, ve ipoon ndiran tonenen avodi.<sup>o</sup>

<sup>17</sup>Maaron tovene paam. Ŋgar toni iyaryaŋ kat ighaze igham poian Abaram toman papaghu toni. Irau itoor ŋgar toni muul maau. Tauto iwaat tau iza pa saveeŋ mbuaaŋ toni, ve ipariaaŋa le iyaryaŋ kat. Leso iit tamtoghon to izaad pa mbef to ye imbua saveeŋ pani ne, lolood ru pani sob. <sup>18</sup>Tovenen iit to tayoŋ ila to Maaron, leed mbef ru to tipariaaŋ ghiit pa taghur ila toni. Eez, nene saveeŋ mbuaaŋ toni. Ve ite, nene ye tau iza to iwaata pa ipariaaŋ saveeŋ toni. Mbef ru tonene, Maaron irau itoor ŋgar toni, ma itombaan ghiit pani ne maau. Mbef ru tonene tipariaaŋ ghiit kat, lesa takis ghurla toit tunjia, ve taghur mataad pa nepooŋ poia to Maaron pale igham pait.<sup>p</sup>

<sup>19-20</sup>Nepooŋ poia to taghurghur mataad pani ne, nene ikis ghiit tunjia, inimale badewaŋ to ikis waan. Pasa, Ŋgeu to inim ataam pait pa tagham nepooŋ tonenen, ye imuŋ pait, ve iloŋ ila rumai to ndug sambam wa. Nene Krisi. Ve uli to ipoon rumai lolo to patabuaŋ le patabuaŋ kat, ye ila ilib pani, le ila peria to Maaron. Pasa, Krisi, ye inim daba tau to watoŋrau inimale Melkizedek. Tovenen ye pale iyoon bodbodaŋ pa Maaron ve iit tamtoghon, ve uraat toni tonowen iseŋga itaghoni taghoni gha ila.<sup>q</sup>

### Melkizedek, ye kinik ve ŋgeu to watoŋrau

**7** <sup>1</sup>Melkizedek to nasavia ne, ye kinik to ndug Salem,<sup>r</sup> ve ye ŋgeu to watoŋrau to imbesmbees pa Maaron Tiina To Ilib Pa Ndimaronŋa Tisob. Sawa to Abaram yesŋa kinik pida tigham malmal ve ilib padi, ye imuul ila le ivot to Melkizedek izi ataam luvuŋa. Ghoro Melkizedek ighur poia to Maaron iza toni.<sup>s</sup>

<sup>2</sup>Ye ighur poia to Maaron iza toni le isob, ghoro Abaram imundig, ve ilup mbef tisob to tila tigham malmal ve tiyou di tinim ne, ve ivalag di tinim ndouŋ saanŋul. Ghoro ighur ndouŋ eez inim Melkizedek le.

Yo, Melkizedek iza pughu tovene: ‘Kinik to ŋgar denjia.’ Ve ye iŋgin ndug Salem. Ve Salem pughu, nene ‘ŋgar luuma.’ Tovenen ye kinik to ŋgar denjia ve ŋgar luuma. <sup>3</sup>Ve mbef ite. Ighaze tawaat Maaron aliŋa, nene taghita saveeŋ waaro eta to isavia Melkizedek tama ve tina ve pughu toni ne maau. Ve sawa to tina ipoopa, ve sawa to ye imaat, nene paam, timbood saveeŋa eta maau. Tovenen taghita taghaze ye inim ghilaloŋ poia eez pa Maaron Natu. Pasa, Yesu ye ŋgeu to watoŋrau to iyoon bodbodaŋ pa Maaron ve iit tamtoghon irau sawa isob.<sup>t</sup>

**o 6:16** Igham 22:10+    **p 6:18** Tit 1:2    **q 6:19-20** Mbo 110:4; Hib 4:14, 5:6, 9:24  
**r 7:1** Yerusalem iza ite, nene Salem (Mbo 76:2).    **s 7:1** Mbnp 14:17+    **t 7:3** Mbo 110:4

<sup>4</sup>Aghita. Ŋgar to timbuud Abaram igham pa Melkizedek, nene ipatoon ghiit ighaze Melkizedek, ye iza tiina kat. Pasa, mbef to tila tigham malmal ve tiyou di tinim ne, Abaram ivalag di tinim ndouŋ saangul, ve ighur ndouŋ eez inim Melkizedek le. <sup>5</sup>Yo, tagham ŋgar pa tutuuŋ to muri Maaron igham pa yes Israela. Levi papaghu toni to tinim ndiran to watoonrau, ve ival tiina to Israel, yes siŋ ee moghon. Pasa, tisob tivot ila to Abaram. Eemoghon tutuuŋ to Mose isaav tovene: Ival tiina to Israel irau tivalag mbef todi tinim ndouŋ saangul, ve tigham ndouŋ eez pa yes to Levi papaghu toni.<sup>u</sup>

<sup>6</sup>Melkizedek, ye ivot ila to Levi maau. Eemoghon mbef to Abaram iyou di ne, tauto ivalag di tinim ndouŋ saangul, ve ighur ndouŋ eez ila inim Melkizedek le. Aghita. Abaram iza tiina kat. Pasa, Maaron imbua saveen tomani pa mbef naol. Eemoghon Melkizedek iza tiina ilib pa Abaram. Tauto ipaloti ve ighur poia to Maaron iza toni. <sup>7</sup>Iit tawatag: Ŋgeu to igham palotiŋ pa tamtoghon, ye iza ilib pa yes to tigham palotiŋ ila toni. <sup>8</sup>Ve mbef ite paam. Onoon, paitoon to tamtoghon tighurghur di ila pa Maaron, nene Levi papaghu toni to tiyouyou di tinim ledi. Eemoghon yes tikis uraat todi itaghoni taghoni gha ila ne maau. Tighamgham uraat ila le sawa to ighaze timaat, ghoru tamtoghon papaghu tigham inadi. Eemoghon Melkizedek to Abaram igham mbef pida pani, timbood saveen eta pa mateen toni maau. Tovenen ye inim ghilaloon pa Ŋgeu to inep mata iyaryaar irau sawa isob.<sup>v</sup>

<sup>9-10</sup>Ve iit irau tasaav taghaze: Sawa to Melkizedek ivot to Abaram, ve Abaram ivalag mbef toni ve igham pida ila toni, nene Levi toman papaghu toni nimadi inep ila mbef tonowen paam. Onoon sawa tonenen, tipoop Levi sone. Eemoghon muri, ye ivot ila to Abaram papaghu toni.

### **Yesu, ye ŋgeu to watoonrau inimale Melkizedek**

<sup>11</sup>Muuŋ, yes Israela tigham tutuuŋ to Maaron, ve tineep ila tutuuŋ tonowen samba. Tutuuŋ tonenen isaav tovene: Levi papaghu toni moghon to Maaron ighur di pa uraat to watoonrau. Laak, ighaze uraat todi to watoonrau igharaat tamtoghon le tingalaan kat ila Maaron mata, pughu vena to Maaron isaav ighaze muri, ŋgeu ite to watoonrau pale ivot, ve igham uraat inimale Melkizedek. Ŋgeu tonowen, uraat toni inimale Aron ve papaghu toni maau.<sup>w</sup>

<sup>12</sup>Eemoghon ighaze Maaron ighur uraat to watoonrau ila tamtoghon ite nima, nene ipatoonŋa ighaze ye itoor tutuuŋ toni wa.<sup>x</sup>

<sup>13</sup>Ŋgeu to watoonrau to nisasavia ne, nene Tiina toit Yesu. Ye ivot ila to Levi maau. Ye ivot ila to Yakop natu Yuda. Ve iit tawatag: Muuŋ ve inim,

---

**u** 7:5 Nam 18:21    **v** 7:8 Hib 5:6, 6:20    **w** 7:11 Hib 8:7    **x** 7:12 Ro 10:4; Ga 3:24+;  
Hib 8:13

paghu eta to Yuda ikis uraat to watoonrau maau. <sup>14</sup>Pasa, sawa to Mose ighur tamtoghon pa tigham uraat to watoonrau, ye isavia aliņa eta ijarua Yuda pagghu toni maau.<sup>y</sup>

### Maaron irabolin ataam mungina to tutuuņ pa ataam paghu

<sup>15</sup>Saveeņ to nisasavia ne, ngar tiam avaat ighami wa. Aazne, ngeu paghu eez to watoonrau ivot wa. Ye inimale Melkizedek. <sup>16</sup>Tutuuņ to Mose isaav tovene: Yes to tivot ila to Levi moghon, ghoru tinim ndiran to watoonrau. Eemoghon Yesu inim ngeu to watoonrau itaghton ataam tonowen maau. Ye inim ngeu to watoonrau pasa, ye tapiri tiina kat, ve ineep mata iyaryaar irau sawa isob. Irau imaat muul maau. <sup>17</sup>Pasa, Maaron aliņa isavia ighaze:

“Yom ngeu to watoonrau unumale Melkizedek. Ve yom pale uneepp tovene itaghoni taghoni gha ila.”<sup>z</sup>

<sup>18-19</sup>Tutuuņ mungina, le tapiri irau to iuul tamtoghon maau, ve irau igharaat mbep eta ivot denja kat maau. Tauto Maaron irabolini pa ataam paghu to poia kat le ilib pa ataam mungina. [Ataam tonowen, nene Yesu tau.] Ye igham ghiit tala tagharau Maaron kat. Leso tagham nepoon poia to taghur mataad pani ne.<sup>a</sup>

<sup>20</sup>Sawa to Maaron ighur Yesu inim ngeu to watoonrau, ye imbua saveeņ tomani, ve ipariaaņ saveeņ tonowen le iyaryaņ kat. Eemoghon Levi papaghu toni, Maaron igham ngar tovene pa todi eta maau.

<sup>21</sup>Aghita. Maaron imbua saveeņ ariņa kat toman Yesu. Pasa, isaav pani ighaze:

“Ŋgeu Tiina, ye imbua saveeņ toman ghom, ve ipariaaņa le iyaryaņ kat. Irau itoor ngar toni muul maau. Yom ngeu to watoonrau, ve uraat tiom tonanan irau isob maau. Pale inepneep tovene, itaghoni taghoni gha ila.”<sup>b</sup>

<sup>22</sup>Tovenen ataam paghu to aazne tataghoni lesu itija Maaron talup ghiit tanim ee moghon, nene le saveeņ mbuaaņ to poia kat. Ilib pa saveeņ to muuņ Maaron imbua toman yes Israela. Ve Yesu to iyoon pa saveeņ mbuaaņ paghu tonenen ve igham uraata, lesu anoņa ivot.<sup>c</sup>

### Yesu, ye ngeu to watoonrau to irau igham mulin ghiit

<sup>23</sup>Muuņ, yes Israela ledi ndiran katindi to watoonrau. Tikis uraat todi iseņseņga itaghoni ila ne maau. Pasa, tighamgham uraat ila le sawa to ighaze timaat, ghoru tamtoghon papaghu tigham inadi. <sup>24</sup>Eemoghon uraat to Yesu, nene irau isob maau. Pasa, ye ngeu to watoonrau to ineepp mata iyaryaar irau sawa isob. <sup>25</sup>Tovenen yes to tiņarua Maaron ila Yesu

---

y 7:14 Mt 1:1; Syg 5:5 z 7:17 Mbo 110:4; Hib 5:6 a 7:18-19 Ro 8:3+, 10:4; Ep 2:18; Hib 8:13 b 7:21 Mbo 110:4 c 7:22 Hib 8:6, 12:24

iza, ye irau igham mulin di. Pasa, ye igham naghood ve ineeep igharau Maaron irau sawa isob, leso isuj Maaron pa iuul ghiit.<sup>d</sup>

<sup>26</sup>Poia kat pa iit leed ngeu to watoonrau tovene. Ye irau iuul ghiit. Pasa, ye inimale iit tamtoghon samsamiaad to taan maau. Ye le sosor eta maau. Ye patabuan, ve ngar toni isob, nene ingalaan moghon. Ve Tama Maaron ighami iza ila ndug sambam, ve aazne iza ilib pa mbep to naol ne.<sup>e</sup>

<sup>27</sup>Tovenen ye inimale daba pida to watoonrau maau. Pasa, yes tonowen, sawa isob tighamgham watoonrau pa tireu sosor to taudi muun. Ghoro tigham watoonrau pa sosor to tamtoghon pida. Eemoghon Yesu, ye le sosor eta pa igham watoonrau pani ne maau. Ve mbep ite paam. Watoonrau to ye igham pa ireu sosor to iit tamtoghon, ye ighami pa ee moghon, ve isob. Watoonrau tonowen, ye ighami indeej sawa to iyokia tau ve imaat.<sup>f</sup>

<sup>28</sup>Tamtoghon tisob to tighur di tinim daba to watoonrau itaghon tutuun to Mose ne, tapiridi imbool. Pasa, yes to taan. Tauto Maaron igham tutuun pa yes Israela, ve muri ghoru, ighur tau Natu inim ngeu to watoonrau. Ye inimale ndiran pida to watoonrau maau. Pasa, Maaron imbua saveej tomani, ve ipariaan le iyaryaan kat. Ve ngar isob to Natu tonowen itaghoni, tauto ighami le iraua kat pa uraat toni. Ve ye pale ineeep tovene itaghoni taghoni gha ila.<sup>g</sup>

### Krisi ineeep toman Maaron izi sambam ve ighamgham uraat toni

**8** <sup>1</sup>Saveej to nisasavia ne, pughu tovene: Aazne, iit leed daba poia eez to watoonrau. Ye ineeep ila Maaron ariana nima waan igharau ina to ghamuun pooz to sambam we.<sup>h</sup>

<sup>2</sup>Ye ineeep iloon ila mbeez patabuan to iyoon izi sambam, ve ighamgham uraat toni to watoonrau ila lolo to patabuan le patabuan kat. Mbeez tonowen, nene mbeez tau. Tamtoghon to taan tipayoonda maau. Maaron tau ipayoonda.<sup>i j</sup>

<sup>3</sup>Daba tisob to watoonrau, tighur di, leso tighur paitoon to tamtoghon ila pa Maaron ve tigham uraat pa watoonrau todi. Daba toit to watoonrau tovene paam. Irau nima moghon ve ila to Maaron ne maau. Ye irau ikis mbep eta ve ila tomani, leso igham pani inim watoonrau.<sup>k</sup>

<sup>4</sup>Ighaze Yesu inepneep izi taan, ye irau inim ngeu to watoonrau maau. Pasa, watoonrau naol to tutuun to Mose isavia di, tamtoghona tineep pataghaan wa pa tigham uraat padi. <sup>5</sup>Eemoghon yes timbesmbees pa

---

**d** 7:25 Ro 8:34; 1Yo 2:1    **e** 7:26 2Kor 5:21; Hib 4:14+    **f** 7:27 Hib 5:3, 9:12; 1Pe 3:18  
**g** 7:28 Hib 2:10, 5:8+, 7:24    **h** 8:1 Mk 16:19; Ep 1:20; Hib 1:3    **i** 8:2 Sawa to yes Israela tineep izi loloos Sinai pughu, tigharaat mbeez eez inim inadi to sunuun. Saveeja ineeep ila Maaron Igham Mulin Yes Israela, ngat 25 ila 31 ve ngat 36 ila 40. Saveej waaro tonene, isavia mbeez tau to ineeep izi sambam.    **j** 8:2 Hib 9:11,24    **k** 8:3 Hib 5:1, 9:12

Maaron ilooŋ ila mbeez to taan moghon. Mbeez tonowen, mbeb tau maau. Nene mbeez to iyoon izi sambam we anunu moghon. Pasa, sawa to Mose ighaze ipayoon mbeez patabuaŋ to Maaron izi ndug balim, Maaron isaav ariaja pani ighaze: “Mbeez anunu to napatooŋa payom izi lolooz, matam kisini ve ugharaat mbeb tisob titaghoni.”<sup>l</sup>

<sup>6</sup>Ve aazne, uraat to watoonrau to Maaron ighuri ila Yesu nima, nene poia kat ilib pa uraat to watoonrau to muuŋ. Ve ataam paghu to itiŋa Maaron talup ghiit tanim ee moghon, tovene paam. Nene poia kat ilib pa ataam muŋgina, ve le saveeŋ mbuaaŋ popoiadi kat. Ataam paghu tonowen ivot ila uraat to Krisi. Pasa ye to iyoon bodbodaŋ pa Maaron ve iit tamtoghon.<sup>m</sup>

<sup>7</sup>Inimale ataam muŋgina tonowen poia kat, ve le patajani eta maau, tone irau Maaron irabolini pa ataam paghu tonene maau.<sup>n</sup>

<sup>8</sup>Eemoghon Maaron ighita tovene: Moghon moghon tamtoghon toni tiyel pa ataam toni ve tighamgham sosor. Tauto ye isaav ighaze:

“Alooŋ. Sawa eta pale ivot, ghoru you naghur ataam paghu pa yes Israela ve yes Yuda,<sup>o</sup>

leso yeiŋa nilup ghei ninim ee moghon.<sup>p</sup>

<sup>9</sup> Ataam paghu tonene, pale ite pa ataam to naghuri pa nditimbudi. Muuŋ, sawa to nakis yes Israela nimadi ve naghareb di tipul Isip, you navotia ataam muŋgina tonowen padi. Eemoghon titaghoni kat maau. Tauto naghur murig padi.

<sup>10</sup> Ataam paghu to pale naghuri padi, nene vene: Muri, you taug pale naghur tutuuŋ tiou ineep ariaja ila ŋgar todi ve nambooda ila lolodi. Ve you pale nanim Maaron todi, ve yes tinim tamtoghon tiou.<sup>q</sup>

<sup>11</sup> Sawa tonenen ighaze ivot, tamtoghon eta irau ipatoot ndita pa saveeŋ tiou muul maau.

Ve tamtoghon eta irau isaav pa toŋvetaz toni ighaze: ‘Oyai, yam awatag Maaron, ghoru poia!’ vene maau. Pasa, yes tisob pale tiwatag katin ghou. Yes to ledi izadi maau, ve yes to izadi tintina ne paam.<sup>r</sup>

<sup>12</sup> Ve you pale lolog isamin di ve nareua sosor todi isob ilale, ve matag iŋgali muul maau.”<sup>s</sup>

**l 8:5** Igham 40:1+; Mban 7:44; Kol 2:17; Hib 10:1    **m 8:6** 2Kor 3:6+; Hib 7:22

**n 8:7** Hib 7:11,18, 10:1    **o 8:8** Sawa to Kinik Solomon natu Reoboam ingin yes Israela, yes tivalag di tinim ru. Yes to tineep ila pa kagu, tiwaat di Israela. Ve yes to tineep ila pa daudau, tiwaat di Yuda. Eemoghon muri tilup di muul. Tauto sawa to Yesu, tiwaat di tighaze ‘Israel,’ ve tiwaat di ‘Yuda’ paam.    **p 8:8** Yer 31:31+    **q 8:10** Ezek 36:25+; 2Kor 3:3; Hib 10:16    **r 8:11** Is 54:13; Yo 6:45    **s 8:12** Ro 11:27; Hib 10:17

<sup>13</sup>Aghita. Ighaze Maaron isavia ataam paghu eta, nene ipatoon ghiit ighaze ataam to ivot muun, nene munginaan ve igharau ighaze isob. Ataam tovene, mala maau pale ilale kat.<sup>t</sup>

**Ataam mungina, irau igham ghiit tala tagharau Maaron maau**

**9** <sup>1</sup>Ataam to ivot muun, nene le tutuun naol to tisavia sunuun ngara. Ve ataam tonowen isavia mbeez patabuan to iyoon izi taan.<sup>u</sup>  
<sup>2-3</sup>Mbeez tonowen, tipayoonda le isob, ghoru tindaad uli tiina ila lolo, lesu tirab motin lolo inim suruvu ru. Suruvu to inee potla, nene tiwaata tighaze 'ndug patabuan,' ve mbep ru tineep ila lolo. Eez, nene lam aia to tighurghur lam izala. Ve ite, nene ton to tighurghur mberet patabuan izala. Ve suruvu ite to uli tiina tonowen ipoona, nene tiwaata tighaze 'ndug to patabuan le patabuan kat.' <sup>4</sup>Suruvu tonowen, artaal to tunuun naunau vuzi popoia ineep iloon ila. Artaal tonowen, tigharaata pa gol. Ve Bokis to Saveen Mbuaan ineep iloon ila paam. Bokis tonowen, tipaak gol ila lolo ve muri, ve tighur mbep pida tiloon tila. Eez, nene uur to tigharaata pa gol ve tighur anii manna pida ineep iloon ila. Ve mbep ite, nene titi to Aron to isudud. Ve mbep ite, nene yaam babaadi ru to tutuun saangul ineep ila. Tutuun tonowen, nene isavia ataam to yes Israela titaghoni lesu lupuun todi toman Maaron ineep pooi.<sup>v</sup>  
<sup>5</sup>Ve tighur anjela anunudi ru tizala bokis tonenen pogho ve bagedi ipoon avo. Anjela anunudi tonowen tinim ghilaloon pa Maaron nguruba ve tapiri. Bokis tonenen avo, nene tiwaata tighaze 'ndug to rewaan sosor.' Eemoghon aazne, irau nila saveen tonene lolo maau.  
<sup>6</sup>Tigharaat mbep naol tonenen, ve tipayoon di le isob, ghoru ndiran to watoonrau tipamundigin uraat todi. Moghon moghon, tiloon tila mbeez patabuan suruvu to inee potla, ve tighamgham uraat todi. <sup>7</sup>Ve daba todi enjeni moghon to irau iloon ila mbeez suruvu to patabuan le patabuan kat. Eemoghon ye iloon ila pa ee moghon pa ndaman enjaena. Ve irau nima moghon ve iloon ila maau. Ye irau ikis mbep eta sini, ghoru iloon ila. Sawa to iloon ila, ye igham watoonrau pa tau sosor toni muun. Ghoru igham pa yes to tikankan ve tigham sosor.<sup>w</sup>  
<sup>8</sup>Ngar to tighamghami ila mbeez tonenen lolo, Avuvu Patabuan ipatoon ghiit pani tovene: Sawa to mbeez tonenen iyondyood, ataam to taloon tala ndug patabuan ve tagharau Maaron, nene ivot ighazoon sone. <sup>9</sup>Ve mbeez tonenen ipatoon ngar to ivotvot pa sawa tonene ighaze yes to tighurghur paitoon ve watoonrau todi ila pa Maaron itaghon ataam mungina, ngar todi tonowen irau igham di tiyamaan di tighaze tingalaan kat ila Maaron mata ne maau.<sup>x</sup>

t 8:13 Ro 10:4; Hib 7:18 u 9:1 Igham 25:31,40 v 9:4 Igham 16:33 w 9:7 Wkp 16:2-34 x 9:9 Hib 10:1+



<sup>10</sup>Pasa, watoonrau tovene, toman tutuun naol to tisavia sa mbef to irau taghani ve taghuni, ve ataam naol to ririwaan lesa tangaalaan i la Maaron mata, nene mbef to moghon. Irau igharaat lolood le ingalaan kat i la Maaron mata ne maau. Tauto Maaron ighur ataam tonenen ighaze tataghoni i la le sawa to ye igharaat mbef ve igham ataam paghu ivot, ghoru tapuli.<sup>y</sup>

### Krisi siŋ toni, nene inim ataam paghu pa itina Maaron talup ghiit

<sup>11</sup>Ve aazne, ataam paghu tonenen ivot ighazoon pasa, Krisi inim wa. Ye daba to watoonrau to inim ataam pait ve taghamgham mbef popoia i la to Maaron.<sup>z</sup>

Pasa, ye iloon i la mbeez tau to iyoon izi sambam, ve i la peria to Maaron. Mbeez tonowen, poia le poia kat. Ilib pa mbeez to muun yes Israela tireii. Pasa, tamtoghon tireii pa nimadi maau, ve inep izi taan maau. Inep izi sambam.<sup>a</sup>

<sup>12</sup>Sawa to Krisi iloon i la mbeez suruvu to patabuan le patabuan kat, ye i la toman mekmek ma makau natu eta siŋi maau. Ye i la toman tau siŋ toni to imaliŋ inim watoonrau, ve i la ivot to Maaron. Tauto ireu sosor toit, ve igham mulin ghiit. Leso samia tapiri ikis ghiit muul sob, ve taneep mataad iyaryaar le alok. Uraat tonenen, Krisi ighami pa ee moghon, ve isob. Irau ighami muul maau.<sup>b</sup>

<sup>13</sup>Aghita. Muun, ighaze mbef eta igham tamtoghon tisami i la Maaron mata, nene titir mekmek ma makau tamoot eta siŋi, ma avab to makau liva to yab ighani ne izala poghodi. Leso igham tinidi to potla ingalaan ve irau tisun pa Maaron muul.<sup>c</sup>

*d*

<sup>14</sup>Ighaze venen, Krisi siŋ toni ilib kat pa mbef tonowen. Pasa, Avuvu Patabuan to inepneep irau sawa isob ne, tapiri ipaloti, ve iyokia tau ve imaat inim watoonrau pa Maaron, lesa ireu sosor toit. Watoonrau toni tonowen, poia le poia kat. Sosor eta inep i la maau. Tovenen siŋ toni le tapiri tiina. Irau imen lolood ve igham ghiit tayamaan tauud taghaze

---

**y 9:10** Ro 10:4; Ga 3:24+; Kol 2:16+    **z 9:11** Mbef popoia tonene, nene mbef tovene: Krisi igham ghiit tangaalaan kat i la Maaron mata, tovene iit irau tagharau Maaron. Ve taghita saveen mbuaan to Maaron anona, ve izaad pa tagham nepoon poia toman Maaron izi ndug sambam.    **a 9:11** Hib 4:14, 8:1+    **b 9:12** Hib 7:27, 10:10+; 1Pe 1:19    **c 9:13** Yes Yuda tigham ngar tovene: Ighaze tikis mateen eta, ma tighan mbef pida, ma kolekole igham di, ma ndiliva tighita kaiyo todi, nene igham di tisami i la Maaron mata. Tovenen yes irau tigham watoonrau, ma ngar pida, lesa tigharaat taudi ve tinidi to potla ingalaan i la Maaron mata muul. Saveenja inep i la Wok Pris 11:1+, 12:1+, 13:1+. Ndaman isob, sawa tiina to rewaan sosor ighaze ivot, nene daba to watoonrau itir mekmek ve makau ndinatudi siŋidi izala yes Yuda poghodi. Leso igham tamtoghon tisob tingalaan i la Maaron mata muul. Ughita Wkp 16:1+.    **d 9:13** Nam 19:2-22

tanggalaŋ ila Maaron mata. Ve igham ghiit tapul ŋgar to ighereb ghiit pa mateeŋ, leso tambees pooi pa Maaron mata yaryaara.<sup>e f</sup>

<sup>15</sup>Tovenen Kresi, ye ŋgeu to iyoon bodbodaŋ pa Maaron ve iit tamtoghon, ve igharaat ataam paghu pait, leso itija Maaron talup ghiit tanim ee moghon. Yes to timalaŋ pa tutuuŋ to ataam muŋgina, mateeŋ toni ipasob sosor todi atia, ve igham mulin di. Leso tamtoghon tisob to Maaron ipoi di tinim le, tigham nepooŋ poia itaghon saveeŋ mbuaaŋ toni. Nepooŋ tonowen pale iseŋga itaghoŋi taghoŋi gha ila.<sup>g</sup>

### **Kresi siŋ toni ipariaaŋ saveeŋ mbuaaŋ paghu to Maaron**

<sup>16-17</sup>Iit tawatag: Ighaze tamtoghon timbua saveeŋ, yes irau tirab mbep eta imaat inim watoonrau. Leso tipariaaŋ saveeŋ mbuaaŋ todi. Ve ighaze tirab mbep eta imaat maau, nene pale saveeŋ mbuaaŋ todi iyaryaŋ maau.<sup>h i</sup>

<sup>18</sup>Tauto sawa to Maaron imbua saveeŋ toman yes Israela izi lolooz Sinai pa tilup di tinim ee moghon, siŋ to ŋgai imaliŋ. <sup>19-20</sup>Sawa tonenen, Mose iwaat tutuuŋ to Maaron pa yes Israela le isob, ghoru igham siŋ to makau ve mekmek, ve itoora toman ya. Ve igham sipsip oro kavianaŋa ve ikauŋi ila ai isop boga, ve ipazugi izila siŋ tonowen. Ghoru itiri izala rau to tutuuŋ to Maaron ineeŋ ila, ve itiri izala Israela tisob poghodi paam, ve isaav padi ighaze: *“Ataam to ataghoŋi leso yamŋa Maaron alup gham anim ee moghon, tauto ye isavia payam ve alooŋa wa. Ve yam ambua saveeŋ tomani aghaze ataghoŋi. Siŋ tonene, nene pa ipariaaŋ saveeŋ to aazne yam ambua toman Maaron.”*<sup>j</sup>

<sup>21</sup>Ve Mose itaghon ŋgar raraate pa mbeez patabuaŋ to Maaron toman mbep to suŋuuŋ to tineep ila lolo ne paam. Igham siŋ ve itiri izala poghodi. <sup>22</sup>Pasa, saveeŋ to ineeŋ ila tutuuŋ to Mose, isaav tovene: Ighaze siŋ imaliŋ, nene irau igham mbep tisob tingalaŋ ila Maaron mata. Mbep eŋaŋa moghon to maau. Ve ighaze siŋ imaliŋ maau, nene Maaron irau ireu sosor maau.<sup>k</sup>

### **Kresi igham watoonrau pa ee moghon, ve isob**

<sup>23</sup>Mbeez patabuaŋ to yes Israela tireii, toman mburuguuŋ to tineep ila lolo, nene mbep tau maau. Nene mbep to tineep izi sambam ne anunudi

---

**e 9:14** Ataam ite to tator saveeŋ to ipasob saveeŋ waaro tonene, nene vene: ‘igham ghiit tapul ŋgar naol to suŋuuŋ to iuul ghiit maau, ve tambees pooi pa Maaron mata yaryaara.’ **f 9:14** Tit 2:14; Hib 10:22; 1Yo 1:7 **g 9:15** Lu 22:20; Ro 3:25+; 1Tim 2:5 **h 9:16-17** Ataam ite to tator saveeŋ waaro ru tonene nene vene: Ighaze ŋgeu eta igham ŋgar pa mateeŋ toni ve ighaze irei mbep toni, ye pale isaav ghazoŋa: muri, sei pale igham sa mbep. Nene inim saveeŋ mbuaaŋ toni. Saveeŋ tonowen pale iyoon tovene le sawa to ye imaat, ghoru tirei mbep toni itaghon saveeŋ tonenen. Ve ighaze ye inepneep mata iyaryaar sone, nene irau titaghon saveeŋ tonenen maau. Saveeŋ tonenen pale iyondyood le irau ŋgeu tonenen imaat, ghoru anoŋa toni ivot. **i 9:16-17** Mbnp 15:9+; Mt 26:28 **j 9:19-20** Igham 24:8 **k 9:22** Wkp 17:11; Ep 1:7

moghon. Tauto tirabrab ŋgai tinim watoonrau, leso siŋ to mbeb tonowen igham mbeez toman mburuguuŋ to tineep ila lolo ne tiŋgalaanŋ ila Maaron mata. Eemoghon mbeb tau, nene tineep izi sambam. Tauto ŋgar tovene irau igham di tiŋgalaanŋ maau. Ledi watoonrau to poia kat le ilib pa siŋ to ŋgai, ghoru igham di tiŋgalaanŋ ila Maaron mata.<sup>l</sup>

<sup>24</sup>Pughu tonene to Kriŋi ilooŋ ila mbeez patabuanŋ to tamtoŋhon tigharaata pa nimadi ne maau. Pasa, mbeez tonowen, nene mbeez tau maau. Nene mbeez to ineep izi sambam we anunu moghon. Ye igham naghood ve ilooŋ ila ndug sambam lolo kat. Tauto aazne, ineep toman Tama Maaron, ve iuluul ghiit.<sup>m</sup>

<sup>25</sup>Yes Yuda, ndaman to naol ne, daba to watoonrau ilonjlooŋ ila mbeez suruvu to patabuanŋ le patabuanŋ kat. Ve sawa to ilooŋ ila, ye ila toman tau siŋ toni maau. Ye ilala toman siŋ to ŋgai. Eemoghon Kriŋi, ye igham watoonrau pae katindi maau. Iyokia tau ve imaat pa ee moghon, ve isob.

<sup>26</sup>Ve inimale ye itaŋhon ŋgar to daba to watoonrau to taan titagħoni, tone sawa to Maaron ighur sambam ve taan ve inim, ye ighamgham yabyabuŋ ve mateeŋ. Eemoghon maau. Aazne, nene sawa to Maaron ipasob uraat toni. Tauto Kriŋi izi inim taan, ve iyokia tau ve imaat, leso ireu sosor toit ve ipasob samia tapiri. Ve uraat tonenen, ye ighami pa ee moghon ve isob. Iräu ighami muul maau.<sup>n</sup>

<sup>27</sup>Tamtoŋhon tisob pale timaat pa ee moghon ve isob, itaŋhon Maaron ŋgar toni. Ve muri, gabizooŋ todi pale ivot ve tigham atia todi.<sup>o</sup>

<sup>28</sup>Kriŋi tovene paam. Ye iyokia tau ve imaat inim watoonrau pa ee moghon, ve isob. Ye imbaad patanani tiina pa ireu sosor to tamtoŋhon katindi. Ve muri, ye pale imuul izi inim. Sawa tonenen, ye iräu igham uraat muul pa rewaanŋ sosor to tamtoŋhon maau. Ye pale inim pa igham mulin yes to tighur matadi pani ve tisaŋani.<sup>p</sup>

### Mateeŋ to Kriŋi, nene watoonrau kat

**10** <sup>1</sup>Watoonrau to tigham di titagħon tutuuŋ to Mose, nene mbeb tau maau. Nene tinimale mbeb popoia to muri tivot ne anunudi moghon. Aghita. Ndaman to naol ne, ndiran to watoonrau tinoknok rabuuŋ ŋgai pa tireu sosor to tamtoŋhon. Eemoghon yes to tighaze tila tigharau Maaron ve tisuuŋ pani, watoonrau tovene iräu igham di tineep denjadi kat ila ye mata ne maau. Maau le maau kat. <sup>2</sup>Ve inimale watoonrau tovene iräu ireu sosor todi isob ilale, ve igham di tineep ŋgalaŋadi kat ila Maaron mata iräu sawa isob, tone tiyamaan di tighaze ledi sosor maau, ve tipul ŋgar to rabuuŋ ŋgai pa tireu sosor todi.<sup>q</sup>

---

l 9:23 Hib 8:5 m 9:24 Ro 8:34; Hib 4:14, 8:1; 1Yo 2:1 n 9:26 Hib 7:27; 1Pe 3:18  
o 9:27 Mbnp 3:19; 2Kor 5:10; Syg 20:11+ p 9:28 Mt 26:28; Ro 6:10; Pil 3:20; Tit 2:13  
q 10:2 Kol 2:17; Hib 7:19, 9:9+

<sup>3</sup>Eemoghon maau. Watoonrau to ndaman to naol tighamgham di, nene tigham di matadi ingalngal sosor todi. <sup>4</sup>Pasa, makau ma mekmek sijidi, nene irau ireu sosor to tamtoghon maau.

<sup>5</sup>Tauto sawa to Krisi izi inim taan, ye isaav pa Maaron ighaze:

“Ijgar to rabuuj mbeb inim watoonrau toman ijgar to nigham aniiij pa nipait ghom, yom lolom pani maau.

Eemoghon yom ugharaat anojag pataghaaj wa. Leso inim inag pa naneep ila.<sup>r s</sup>”

<sup>6</sup> Ve ijgar to ghuruuj mbeb izala artaal lesu yab ighan suvuni, toman ijgar to rabuuj mbeb pa rewaaj sosor to tamtoghon, nene paam, irau lolom maau.

<sup>7</sup> Tauto nasaav naghaze: ‘Maaron, ughita. You taug tonene. You nanim pa nataghon lolom. Ijgar to naghaze naghami, saveeja timbooda pataghaaj wa.’”

<sup>8</sup>Aghita. Papazogi, Krisi isavia watoonrau to tighamgham di titaghon tutuuj to Mose ighaze: “Ijgar to rabuuj mbeb inim watoonrau, toman ijgar to nigham aniiij pa nipait ghom, ve ijgar to ghuruuj mbeb izala artaal lesu yab ighan suvuni, ve ijgar to rabuuj mbeb pa rewaaj sosor to tamtoghon, ijgar naol tonene, yom lolom padi maau. Ijgar tovene, nene irau lolom maau.”<sup>t</sup>

<sup>9</sup>Ghoro isaav muul ighaze: “Maaron, ughita. You taug tonene. You nanim pa nataghon lolom.” Saveej tonene, ngara tovene: Ataam mungina to watoonrau to ye isavia muuj, ye irab motini, ve irabolini pa ataam paghu wa. <sup>10</sup>Aghita. Yesu Krisi iyokia tau itaghon Maaron lolo, ve imaat pa ee moghon pa ireu sosor toit. Tauto aazne, ye igham ghiit tanim tamtoghon patabuaaja to Maaron wa.<sup>u</sup>

<sup>11</sup>Ndag to naol ne, ndiran to watoonrau tiyondyood ila artaal nagho, ve tinoknok ghamuuj watoonrau raratedi moghon. Eemoghon watoonrau todi naol tonowen irau tireu sosor eta maau. <sup>12</sup>Ve Krisi, ye igham watoonrau ee moghon kat pa ireu sosor to tamtoghon, ghoro iza ila pa sambam, ve mbole izi ila pa Tama Maaron nima waan. Watoonrau toni tonowen, tapiri inepneep irau sawa isob. Muuj, aazne, ve itaghoni taghoni gha ila.<sup>v</sup>

<sup>13</sup>Tovenen sawa tonenen ve inim, Krisi ineeep izi sambam, ve isasaan. Ighaze Maaron itatan koia le tapiridi isob, ghoro ye ana ivazag di ila aghe samba.<sup>w</sup>

<sup>14</sup>Watoonrau ee moghon kat to Krisi ighami, nene igham tamtoghon toni tineep denjadi kat ila Maaron mata. Ve pale tineep tovene

---

r 10:5 Saveej tonene isavia sawa to Maaron Natu izi inim taan ve inim tamtoghon.

s 10:5 Mbo 40:6+, 50:9 t 10:8 Hos 6:6; Mt 9:13, 12:7 u 10:10 Yo 17:19; Hib 9:28, 13:12 v 10:12 Mk 16:19; Kol 3:1; Hib 1:3, 8:1 w 10:13 Mbo 110:1; Hib 1:13

itaghoni taghoni gha ila. Ve aazne, ye ighamgham uraat padi leso titaghon katin ngar patabuanj.

<sup>15</sup>Avuvu Patabuanj paam ipariaanj ghiit pa taghur ila saveej tonene. Pasa, muun, ye isaav ighaze:

<sup>16</sup>“Ataam paghu to pale naghuri pa yes Israela, nene vene:  
Muri, you pale naghur tutuun tiou ineej tunja ila lolodi, ve nambooda ila ngar todi paam.”<sup>x</sup>

<sup>17</sup>Ghoro isaav muul ighaze:

“Ve ngar todi samsamia naol to tiyel pa tutuun tiou, you pale nareu di tilaledi, ve matag injal di muul maau.”<sup>y</sup>

<sup>18</sup>Tovenen aghita. Ighaze Krisi ireu sosor toit isob ilale, nene watoonrau to rewaanj sosor paam, le uraat muul maau.

### Taghur ila to Krisi ariana, ve tala tagharau Maaron

<sup>19-20</sup>Sawa to Yesu imaat ve imundig muul, ye iloonj ila mbeez to ndug sambam. Ve uli to iponpoon ndug patabuanj, ye ireep motini, ve malmali ila peria to Maaron. Tauto aazne, mbeb eta ipoon ghiit pa Maaron muul maau. Tovenen yam tonvetaz, iit tamatughez pa taloon tala ndug to patabuanj kat, ve tala peria to Maaron malep. Pasa, sij to Yesu igharaat ataam paghu pait wa. Ataam tonowen, nene ye tau. Pasa, ye ineej mata iyaryaar ve iuluul ghiit.<sup>z</sup>

<sup>21</sup>Aazne, iit leed ngeu tiina eez to watoonrau. Ye daba to injin ruum to Maaron. Ruum tonene, nene iit tamtoghon toni.<sup>a</sup>

<sup>22</sup>Tovenen tala tagharau Maaron toman lolood ee moghon, ve taghur ila toni ariana taghaze ye irau iuul ghiit. Pasa, Maaron itir Yesu sij toni izala poghood, ve taririu pa ya ngalaana wa. Tovenen ngar toit samia to muun igham ghiit tayamaan tauud taghaze tasami ila Maaron mata, nene ye ireua isob ilale, ve igham ghiit tanjalaanj kat wa.<sup>b</sup>

<sup>23</sup>Iit taghur ila saveej mbuaanj to Maaron to ighaze ye pale igham nepoonj poia pait. Tauto taghurghur mataad pa nepoonj poia tonowen, ve tavovotia saveeja pa tamtoghon. Saveej mbuaanj toni tonowen, lolood ru pani malep. Taghur ila ariana ve takisi tunja. Pasa, Ingeu to imbua saveej tonenen, ye itataghon saveej toni.<sup>c</sup>

<sup>24</sup>Ve takaal ataam pa tapamundigin nditaad, leso iit tasob lolood pa tamtoghon ve tagham poian di, ve tagham uraat popoiadi naol.<sup>d</sup>

<sup>25</sup>Ve ngar to talup ghiit pa sunjuun, nene tapuli malep. You nasavia saveej tonene pasa, tamtoghon tiam pida naghodi perperia pa lupuun

---

x **10:16** Yer 31:33+; Hib 8:10+    y **10:17** Yer 31:34    z **10:19-20** Mt 27:51; Yo 14:6; Ep 2:18  
a **10:21** Hib 4:14    b **10:22** Ezek 36:25; Ep 5:26; Hib 9:14    c **10:23** 1Kor 1:9; 1Tes 5:24;  
Hib 3:6    d **10:24** Hib 3:13

tiam maau. Tovenen matamim iŋgal ve alup gham ve awapalotin gham. Pasa, sawa to Tiina toit, nene inim igharau wa.<sup>e</sup>

### Ighaze taghur muriid pa Krisi, nene leed ataam muul maau

<sup>26</sup>Alooj. Ighaze talooj saveej onoon to Krisi ve ŋgar toit ighazooj pani, eemoghon muri ŋgar toit iyaryaaj muul taghaze tanok ghamuuj ŋgar samia, nene pale leed watoonrau ite paam pa ireu sosor toit maau.<sup>f</sup>

<sup>27</sup>Ighaze tagham tovene, iit leed ataam eta muul maau. Tovenen matughezaaj tiina pale igham ghiit ve tanepneep, ve tasaan moghon pa gabizooj to Maaron ve atia to pale ighuri pait. Atia tonowen, nene yab tiina to pale ighan yes to tizorzoor Maaron.<sup>g</sup>

<sup>28</sup>Agham ŋgar pa tutuuj to Mose. Tutuuj tonowen, ariaja kat. Ighaze ŋgeu eta mata velegini ve iyel pani, ve tamtoghon ru ma tol tighita ve tipariaaj saveej tighaze ye igham ŋgar tovene, nene ye pale imaat. Irau lolodi isamini maau. <sup>29</sup>Laak, ighaze ŋgar tovene ivotvot pa yes to matadi velegin tutuuj to Mose, nene pale vena pa tamtoghon to ighaze mata velegin Maaron tau Natu? Ye pale igham atia to samia le samia kat. Onoon, Krisi siŋ toni imaliŋ, leso ipariaaj saveej mbuaaj to ataam paghu, ve igham ŋgeu tonenen inim Maaron le. Eemoghon ye mata velegin siŋ patabuaaj to Krisi inimale mbeb sorok, ve avo samia pa Maaron Avuvu to inim ataam pa poia to Maaron iza toit.<sup>h</sup>

<sup>30</sup>Iit tawatag ŋgeu to isaav ighaze:

“Uraat to yatuuj ŋgar samsamia to tamtoghon, nene uraat tiou.

Taug pale naghur atia padi.”<sup>i</sup>

Ve saveej toni waaro ite isaav tovene: *“Ŋgeu Tiina pale iŋgabiiz tamtoghon toni ve ighur atia padi.”*<sup>j</sup>

<sup>31</sup>Tovenen iit tamatughez pa Maaron mata yaryaara. Pasa, ye nima mala. Ighaze ikis ghiit ve ighur atia pait, nene pale tasami le tasami kat.<sup>k</sup>

### Tayoon ariaja pa badooj patajani

<sup>32</sup>Matamim iŋgal imuul ila pa muuj, sawa to Maaron ipaghazoojan gham pa varu poia. Sawa tonenen, tamtoghon tighur patajani tiina kat payam pasa, yam ataghon Krisi. Eemoghon yam apul ghurla tiam maau, ve ayoon ariaja pa badooj patajani.<sup>l</sup>

<sup>33</sup>Sawa pida, tipayoon gham ila ival tiina matadi, ve tipiyaav saveej velegiij payam, ve tigham samin gham. Ve sawa pida, tigham ŋgar tovene pa nditamim paam. Tauto lolomim isamin nditamim tonanan, ve ayoon toman di pa badooj patajani todi tonowen. <sup>34</sup>Ve sawa to tikis

---

e 10:25 Mban 2:42; Ro 13:11; Kol 3:16 f 10:26 Hib 6:4+; 2Pe 2:20+ g 10:27 2Tes 1:8+; Hib 12:29; Syg 20:15 h 10:29 Lo 32:35+; Hib 2:2+, 12:25 i 10:30 Lo 32:35; Ro 12:19 j 10:30 Mbo 50:4, 135:14 k 10:31 Lu 12:5 l 10:32 Pil 1:29+

nditamim pida ve tighur di tilooŋ tila ruum to yabyabuunŋ ne paam, lolomim isamin di ve auul di. Ve sawa to tamtoghon tilat ve tiyou mbbeb tiam tinim ledi, yam lolomim poia moghon. Pasa, awatag aghaze yam lemim mbbeb poia to ilib kat pa mbbeb tiam to tiyou di ne. Mbbeb tonowen, nene mbbeb tau, ve ineeŋ le alok.<sup>m</sup>

<sup>35</sup>Tovenen ŋgar tiam to amatughez maau ve ayoon ariana pa ghurla tiam, yam apuli malep. Pasa, ighaze akis ŋgar tonanan, nene pale aghita atia tiina to poia kat.<sup>n</sup>

<sup>36</sup>Tovenen yam ayoon ariana, ve ataghon Maaron lolo. Leso aghita saveeŋ mbuaaŋ toni anoŋa.<sup>o</sup>

<sup>37</sup>Pasa, Maaron saveeŋ toni isaav tovene:

“Ŋgeu to ighaze inim ne, mala maau pale inim. Irau izuar maau.

<sup>38</sup> Ve tamtoghon tiou to titaghon ŋgar deŋia, nene pale ghurla todi igham pooz pa nepooŋ todi.<sup>p</sup>

Eemoghon ighaze tamtoghon eta imatughez, ve lolo ighur ighaze ipul muri payou, nene pale lolog poia pani maau.”<sup>q</sup>

<sup>39</sup>Ve iit tanimale yes to timatughez, ve tipul muridi pa Maaron ve tilaledi ne maau. Iit tamtoghon to takis ghurla toit tunia, lesa taneep mataad iyaryaar le alok.

### Ŋgar to taghur ila

**11** <sup>1</sup>Ŋgar to taghur ila, nene vene: Mbbeb popoia to taghur mataad pani, lolood ru pani maau, ve ŋgar toit iyaryaŋ taghaze mbbeb tonowen pale tivot. Ve mbbeb to aazne taghita di pa mataad maau, ŋgar toit iyaryaŋ taghaze onoon kat mbbeb tonowen tinepneep.<sup>r</sup>

<sup>2</sup>Nditimbuud to muuŋ, ghurla todi iyaryaŋ tovene. Tauto Maaron lolo poia padi ve ipait di.

<sup>3</sup>Ghurla toit, to igham ghiit taghilaal taghaze: Maaron isaav moghon, ve sambam ve taan toman mbbeb to naol ne tivot. Tovenen mbbeb tisob to aazne taghita di ne, Maaron igharaat di pa mbbeb eta to iit irau taghita pa mataad ne maau.<sup>s</sup>

### Ghurla to Abel, Enok ve Noa

<sup>4</sup>Muuŋ, Abel ighur ila to Maaron. Tauto igham watoonrau poia le ilib pa watoonrau to togha Kain. Ghurla toni tonowen, tauto igham Maaron lolo poia pani ve watoonrau to ye igham pani, ve ipaiti ighaze ye ŋgeu

---

**m 10:34** Mt 6:20, 25:36; Hib 13:3; 1Pe 1:4+    **n 10:35** Mt 5:11+    **o 10:36** Lu 21:19; Hib 12:1; Syg 13:10    **p 10:38** Ataam ite to tator saveeŋ waaro tonene, nene vene: “Tamtoghon tiou to tinep deŋiadi ila matag, nene pale tighur ila ve tigham nepooŋ poia inim tiou.”    **q 10:38** Hab 2:3+; Ro 1:17    **r 11:1** Ro 8:24+; 2Kor 4:18, 5:7    **s 11:3** Mbnp 1:1+; Mbo 33:6+; 2Pe 3:5

denja eez. Tovenen onoon, Abel imaat wa. Eemoghon kamos to ghurla toni, nene inimale Abel isavsavaa pait sone.<sup>f</sup>

<sup>5</sup>Enok ighur ila to Maaron. Tauto imaat maau, ve Maaron ighami iza ila sambam. Muri, tamtoghon tikaala le maau. Pasa, Maaron ighami iza ila wa. Ve sawa to Enok inepneep izi taan, tipait varu tighaze Maaron lolo poia pani.<sup>u</sup>

<sup>6</sup>Eemoghon ighaze taghur ila to Maaron maau, nene irau ye lolo poia pait maau. Pasa, tamtoghon to ighaze ila igharau Maaron, ye irau ighur ila ighaze Maaron inepneep ve ighamgham atia popoia pa yes to tizuarua di pani.

<sup>7</sup>Noa ighur ila to Maaron ve imatughez pani. Tovenen sawa to Maaron isavtarani pa patanjani to ighaze ivot, ye itaghon Maaron aliņa ve igharaat waan. Onoon, sawa tonenen, tamtoghon tighita patanjani tovene ivot ndag eta sone. Eemoghon Noa ighur ila Maaron aliņa, tauto iuul tau toman azuwa, ve ndinatu toman ndizwadi, ve tineep pooi. Tilaledi maau. Ngar to ye ighami, nene ipatoon ngar samia to tamtoghon to tineep izi taan pa sawa tonenen ivot ighazoon. Ghurla toni tonowen, tauto Maaron ighita ighaze ye ngeu denja.<sup>v</sup>

#### Ghurla to Abaram

<sup>8</sup>Sawa to Maaron ipoi Abaram, ye isaav pani ighaze ipul ndug toni, ve ila pa taan to ye ighaze igham pani. Onoon, sawa tonenen, Abaram ikankaan pa sa ndug to pale ila inep pani. Eemoghon ye ighur ila to Maaron. Tauto iloon aliņa, ve imundig ipul ndug toni ve ila.<sup>w</sup>

<sup>9</sup>Abaram ighur ila. Tauto inep inim loom izi taan to Maaron imbua saveen pani. Ye le ruum tau maau. Ipapayoon mbeez moghon, ve inepneep ila. Ve muri, natu Isak ve timbu Yakop titaghon ngar raraate. Ve saveen mbuaan to Maaron igham pa Abaram, saveen ee moghon, tauto ye isavia padi paam. <sup>10</sup>Abaram inep tovene pasa, ye ighur mata pa ndug tiina to Maaron igharaata itaghon tau ngar toni. Ndug tonowen, pughu ariana, ve inep tovene irau sawa isob.<sup>x y</sup>

<sup>11</sup>Abaram ighur ila. Tauto Maaron tapiri iza to yesuru Sara ve tipoop. Onoon, yesuru tinim ndolman watwaat, ve sawa todi to popaan isob wa. Eemoghon Abaram ighur ila ighaze Maaron itaghon saveen mbuaan toni. Tauto ighita saveen tonowen anoņa.<sup>z</sup>

<sup>12</sup>Tovenen aghita. Abaram, ye ngeu ee moghon kat, ve inim olman waat wa. Eemoghon yesuru azuwa Sara tipoop, ve tamtoghon to tivot

t 11:4 Mbnp 4:4+; Hib 12:24 u 11:5 Mbnp 5:24 v 11:7 Mbnp 6:13+; Ro 3:22

w 11:8 Mbnp 12:1+ x 11:10 Ndug tiina tonene, nene ndug sambam. y 11:10 Hib 12:22, 13:14; Syg 21:2 z 11:11 Mbnp 17:19, 21:2; Ro 4:18+



ila toni, yes katindi kat. Irau tanin di maau. Pasa, timasa tinim naol tinimale pitum to sambam paronjania, ve magargaar to naari.<sup>a</sup>

<sup>13</sup>Yes tisob tonowen, ghurla todi igham pooz padi le irau mateen todi. Onoon, saveen to Maaron imbua toman di, yes tighita anoŋa maau. Pasa, sawa to saveen tonowen anoŋa ivot, nene inepneep mala sone. Eemoghon lolodi poia pa saveen mbuaan to Maaron inimale tighita anoŋa wa. Ve tivotia taudi tighaze: “Taan, nene ndug tiei kat maau. Nepoon tiei to taan, nene nineep ninim loomba moghon. Pasa, ndug tiei kat, nene sambam.”<sup>b</sup>

<sup>14</sup>Tamtoghon to tisaav tovene, tipatoon taudi tighaze ndug todi eta inepneep. Tauto tikalkaala sone. <sup>15</sup>Ve inimale tigham ngar tiina pa taan todi to tipuli, ve tikausim pani, tone yes irau timuul tila. <sup>16</sup>Eemoghon maau. Pasa, ngar todi iyaryaan pa ndug ite to poia kat ilib pa ndug to tipuli. Ndug tonowen inep izi sambam. Tauto sawa to tipoi Maaron tighaze ye Maaron todi, ye maya pa saveen todi tonowen maau. Pasa, ndug to tighur matadi pani, ye ighuri padi pataghaan ve isasaan di.<sup>c</sup>

<sup>17-18</sup>Abaram ighur ila to Maaron. Tauto sawa to Maaron itoova ve isaav pani ighaze irab natu ee moghon Isak imaat inim watoonrau, ye ighaze itaghon Maaron aliŋa. Onoon, muun Maaron imbua saveen tomani ighaze: “Papaghu tiom kat pale tivot ila to natum Isak.” Eemoghon Abaram inguruut natu tonowen maau.<sup>d</sup>

<sup>19</sup>Pasa, ye igham ngar tovene: Ighaze Isak imaat, nene Maaron irau ipamundigini pa mateen. Ve ngar to ivot pa Isak, nene inimale ye imaat wa, eemoghon Maaron ipamundigini pa mateen, ve ighuri imuul ila to tama Abaram.<sup>e</sup>

### Ghurla to Isak, Yakop, ve Yosep

<sup>20</sup>Isak ighur ila to Maaron. Tauto ighur poia to Maaron iza to ndinatu ru, Yakop ve Esau, ve isaav pa mbep to muri pale ivot padi.<sup>f</sup>

<sup>21</sup>Yakop ighur ila to Maaron. Tauto sawa to iyamaan tau ighaze mateen toni igharau, ye ighur poia to Maaron iza to Yosep ndinatu ru le isob, ghoru iwata aze ila titi toni, ve isun pa Maaron.<sup>g</sup>

<sup>22</sup>Yosep paam ighur ila to Maaron. Tauto sawa to iyamaan tau ighaze mateen toni igharau, ye isaav pa yes Israela ighaze muri Maaron pale igham di tipul Isip. Ve isaav padi pataghaan pa tua. Leso sawa to timundig, matadi inŋal tua, ve tighami tila ve titavia izi taan Kanaan.<sup>h</sup>

### Ghurla to Mose

<sup>23</sup>Mose tama ve tina tighur ila to Maaron. Tauto sawa to tipooa, timatughez pa kinik to Isip aliŋa maau, ve tinŋooz natudi tonowen irau

---

**a 11:12** Mbnp 15:5, 22:17    **b 11:13** Mbnp 23:4; Mbo 119:19; 2Kor 5:7    **c 11:16** Pil 3:20; Hib 13:14    **d 11:17-18** Mbnp 21:12, 22:1+; Yems 2:21+    **e 11:19** Iŋgar to ivot pa Isak, nene inim ghilaloon pa mundigiin to Krisi.    **f 11:20** Mbnp 27:27+, 27:39+    **g 11:21** Mbnp 48:15+    **h 11:22** Mbnp 50:24

kaiyo tol. Pasa, tighita inimale ndipain pida maau. Nagho poia le poia kat.<sup>i</sup>

<sup>24</sup>Mose paam ighur ila to Maaron. Tauto sawa to itub inim olman, lolo pa tamtoghon tiwaata tighaze ye kinik to Isip natu liva natu malep. <sup>25</sup>Ye irau itaghon yes Isipa ve yesna tigham ngar samsamia naol to uliid to tigham lolood poia rismoghon ve isob. Eemoghon lolo pa ngar tovene maau. Ye ighita ighaze ye irau ila toman Maaron tamtoghon toni ve yesna timbaad patanjani, ghoru poia. <sup>26</sup>Ve ye igham ngar tovene: Ighaze tamtoghon tipamayanjini ve tighur patanjani pani inimale tigham pa Mesia, nene poia. Pasa, ye ighur mata pa atia poia to muri pale Maaron igham pani. Ve ighita ighaze atia tonowen, nene ilib kat pa yes Isipa mbaliinj todi to naol ne.<sup>j</sup>

<sup>27</sup>Mose ighur ila. Tauto imundig ve ipul Isip. Ye imatughez pa malmaliinj to kinik maau. Onoon, iit tamtoghon irau taghita Maaron pa mataad maau. Eemoghon Mose, ye iyoon ariana inimale ighita katin Maaron pa tau mata.<sup>k</sup>

<sup>28</sup>Mose ighur ila to Maaron. Tauto ipamundigin ngar to Pasova, ve isaav pa yes Israela tipel sij ila ataam todi todi. Leso anjela to Maaron imbaana ila pa irab yes Isipa ndinatudi aidaba, igham mbep eta padi sob.<sup>l</sup>

<sup>29</sup>Ival tiina to Israel tighur ila to Maaron. Tauto sawa to timbut Te Kaviaana ve tivool tila pa dige ite, yes tilaagh inimale tilaagh izala taan mamaasa. Eemoghon sawa to yes Isipa titoova pa titaghon di, te ipol imuul inim izala poghodi, le tisob tighun te ve timatmaat.<sup>m</sup>

<sup>30</sup>Ival tiina to Israel tighur ila. Tauto tilaagh luvutin ndug tiina Yeriko irau ndag liim ve ru. Ghoru didiinj ariajadi to tiluvutin ndug, tisob tipolpol tizi.<sup>n</sup>

<sup>31</sup>Reap, ye liva to ataam. Eemoghon ighur ila to Maaron. Tovenen sawa to Yosua imbaan yes sandiri tila pa tighita ndug, Reap igham di tila ruum toni, ve injin poian di. Tauto sawa to yes Israela tirab ival tiina to Yeriko to tizoor Maaron aliya, yes tirab Reap maau. Tipuli inep.<sup>o</sup>

### Tamtyes oghon pida to tighur ila ariana

<sup>32</sup>Poia. Irau nayoot saveen ila mala maau. Pasa, leg sawa to nasavia kamos pa Gideon, Barak, Samson, Yepta, David, Samuel, ve propeta to muunj tivotia Maaron aliya ne maau.<sup>p</sup>

<sup>33</sup>Ndiran tonowen tighur ila to Maaron. Tauto ye ipalot di, ve pida tiparab le tilib pa kinik pida to tinjin taan tintina. Ve yes pida to muunj tinjin yes Israela, tipalot tamtoghon pa titaghon ngar denja. Ve tamtoghon todi

---

i 11:23 Igham 2:2+ j 11:26 Hib 10:33+, 13:13 k 11:27 Igham 2:10+; 2Kor 4:18  
l 11:28 Igham 12:21+ m 11:29 Igham 14:21+ n 11:30 Yos 6:1-20  
o 11:31 Yos 2:1+, 6:22+; Yems 2:25 p 11:32 Het 4:1-16:31; 1Sam 1:1-1King 2:12

pida tighita saveeŋ to Maaron imbua toman di ne anoŋa. Ve pida, laion tirau tighan di maau.<sup>q</sup>

<sup>34</sup>Pida, tipiyaav di tila yab tiina lolo. Eemoghon yab le tapiri irau to iwaghamun di maau. Ve pida, Maaron ipaghau di pa buza mata. Pida, tapiridi imbool. Eemoghon Maaron ipalot di, tauto tiparab ariana le tilib pa ndaaba to ndug pida, ve tinaan koiadi tonowen tila.<sup>r</sup>

**Tamtoghon pida, ghurla todi ipalot di, tauto tiyoon ariana pa badooŋ pataŋani**

<sup>35</sup>Ve ndiliva pida, Maaron ipamundigin mateeŋa todi.<sup>s</sup>

Tamtoghon pida, koiadi tighur yabyabuŋ padi ve tisaav padi tovene: "Ighaze yam apul murimim pa Maaron tiam, nene pale nipul gham ala." Eemoghon yes tilooŋ aliŋadi maau, ve tiyoon ariana pa badooŋ pataŋani. Pasa, tighur ila tighaze Maaron pale ipamundigin di pa mateeŋ, ve tigham nepooŋ poia kat to ilib pa pataŋani naol to timbaad di izi taan.

<sup>36</sup>Ve pida, tamtoghon tiwanŋizon di ve tilos di. Pida, tikau nimadi ve aghedi pa sen, ve tighur di tilooŋ tila ruum to yabyabuŋ lolo.<sup>t</sup>

<sup>37</sup>Ve pida, tirab di pa yaam. Pida, tighorot di pa so tinim suruvu ru.<sup>u</sup>

Ve pida, timbut di pa buza timatmaat. Tamtoghon pida tineep sami. Mbolaan igham di, ve ledi nonogiiŋa poia eta maau. Tindud di pa sipsip ma mekmek ulidi moghon. Ve tamtoghon tigham samin di, ve tighur pataŋani naol padi.<sup>v</sup>

<sup>38</sup>Ndiran tonowen, tamtoghon popoiadi kat. Tinimale ival tiina to titaghon ŋgar to taan ne maau. Ndiran tovene, taan tonene poia irau to tineep pani ne maau. Aghita. Nepooŋ todi, poia maau. Ve ledi inadi poia eta to nepooŋ maau. Tauto tiwalaghaagh taghon ndug balim ve lolooz. Ve tinepneep ilooŋ ila taan ve yaam sambudi.<sup>w</sup>

<sup>39</sup>Tamtoghon tisob to nasavia di ne, tighur ila to Maaron. Tauto Maaron lolo poia padi ve ipait di. Eemoghon sawa to tineep izi taan, todi eta ighita saveeŋ mbuaan to Maaron anoŋa maau. <sup>40</sup>Pasa, muuŋ kat, Maaron lolo ighur pataghaan ighaze igham mbeb poia eez<sup>x</sup> to pale iuul ghiit tasob. Leso tasob taneep denjaad kat ila mata. Ve ye lolo pa yes tighami muuŋ malep. Ye ighaze ilup ghiit toman di, ve iit tasob taghami raraate.

**Yesu ipatoon ghiit pa ŋgar to tayoon ariana**

**12** <sup>1</sup>Ival tiina to muuŋ to ŋgaramus nasavia di ne, nene inimale tiyoon luvutin ghiit ve tipariaan ghiit pa taghur ila. Ighaze

---

**q 11:33** Dan 6:1+ **r 11:34** Het 7:19+; 1Sam 17:51; Dan 3:1+ **s 11:35** 1King 17:21+; 2King 4:32+ **t 11:36** Yer 20:2 **u 11:37** Kamos eez to yes Yuda isaav tovene. Muuŋ, tighorot propet Isaia inim suruvu ru. **v 11:37** 1King 21:13; 2Sto 24:21; Mban 7:58, 14:19 **w 11:38** 1King 18:4, 19:9 **x 11:40** Mbeb poia to saveeŋ waaro tonene isavia, nene uraat to Yesu Krisi.

venen, pale tagham vena? Nepooŋ toit, nene inimale taneep ila landooŋ tiina, ve talaan soso mala. Tovenen mbep naol to tipataŋan ghiit pa landooŋ, toman ŋgar samsamia to tikau ghiit ne, iit irau tapul di tisob tineepledi. Ve talaan toman tapiriid taghon ataam to Maaron ighuri pait, ve takiskisi tovene le tapasob landooŋ toit.<sup>y</sup>

<sup>2</sup>Ve mataad ila pa mbep ite paam malep. Mataad ila pa Yesu moghon, ve talaan taŋarua tala. Pasa, ye to imuuj pait ve ipatooŋ ghiit pa ataam to taghur ila. Ve ye to pale igham uraat pait le ghurla toit ivot kat le denja moghon ila Maaron mata. Aghita. Ye imbaad pataŋani, ve tirabi imaat izala ai pambarooŋ. Eemoghon ye ighita mayanjiŋa tonowen inimale mbep sorok. Pasa, ye iwataŋ: Ighaze itaghon katin Maaron ŋgar toni, nene pale muri ineeep pooi toman tini iza. Tauto aazne, ye ineeep ila pa Tama Maaron nima waan igharau ina to ghamuuj pooz.<sup>z</sup>

<sup>3</sup>Onoon, sawa to ye ineeep izi taan, ndiran samsamiadi tighur koi pani, ve tizorzoora. Eemoghon ye iyoon ariana pa badooŋ pataŋani tonowen. Tovenen matamim kisin ŋgar to ye ighami, ve ataghoŋi. Pa vene, pataŋani tiam itatan gham le tapirimim isob.<sup>a</sup>

#### **Maaron ipul pataŋani pida tivot pa ndinatu, leso ipasalunŋan di**

<sup>4</sup>Onoon, yam aparab ariana pa atatan samia tapiri. Eemoghon tiam eta siŋ toni imaliŋ sone. <sup>5</sup>Yam avaat lolomim imaagh pa saveeŋ palotiiŋ eez to iŋarua yam to anim Maaron ndinatu ne? Isaav tovene:

“Natug, ighaze Iŋgeu Tiina ighur pataŋani eta payom pa ipasalunŋan ghom, ughita inimale mbep sorok malep. Ugham ŋgar pani pooi. Ve ighaze iyaan ghom, lolom isami malep.

<sup>6</sup> Pasa, tamtoghon tisob to Iŋgeu Tiina lolo ineeep todi, ye ipasalunŋan di.

Ve tamtoghon tisob to ye igham di tinim ndinatu, ye iloslos di, leso igham di tighilaal.”<sup>b</sup>

<sup>7-8</sup>Tovenen ighaze pataŋani eta ivot payam, ayoon ariana ve ambaada moghon. Pasa, pataŋani tonanan, nene ataam to Maaron ipasalunŋan gham. Ye ighamgham tovene pa ndinatu tisob. Aghita. Ighaze pain eta igham sosor, pale tama ipuli? Maau. Ndipain tisob, nditamandi tipasalunŋan di. Ve Maaron tovene paam. Ye ighurghur pataŋani ivotvot pa ndinatu tisob, leso ipasalunŋan di. Eemoghon ighaze ye ipasalunŋan gham maau, nene ye ndinatu yam maau. Yam animale ndipain to ledi nditamandi maau.<sup>c</sup>

<sup>9</sup>Ve mbep ite paam. Iit tawatag: Nditamaan to taan tigham toon ve tiloslos ghiit, leso tipasalunŋan ghiit. Ve sawa to tigham tovene, iit

---

y 12:1 1Kor 9:24+; Pil 3:13+; Hib 10:36 z 12:2 Pil 2:8+; Hib 1:3, 3:1 a 12:3 Lu 2:34; Syg 2:3 b 12:6 Np 3:11+; Yems 1:12; Syg 3:19 c 12:7-8 Lo 8:5; Np 13:24

taroron padi ve neneerjad moghon. Ighaze venen, vena pa Tamaan Maaron to ingin anunuud ne? Pasa, ye ilib pa nditamaan to taan. Tovenen ighaze ye ighur patajanani eta pait pa ipasalungan ghiit, tapul tauud ila ye nima, ve tambaada moghon. Leso muri, tagham nepoon poia. <sup>10</sup>Nditamaan to taan tipasalungan ghiit pa sawa tuku moghon, ve titaghon ngar to taudi tighita tighaze poia. Eemoghon Tamaan Maaron, ye ipasalungan ghiit, lesa iuul ghiit kat ve tataghon ngar patabuanj tanimale ye tau.<sup>d</sup>

<sup>11</sup>Onoon, sawa to tilos ghiit, lolood poia maau. Lolood ipatajan. Ve ighaze Maaron ighur patajanani pait pa ipasalungan ghiit, nene pale ngara raraate moghon. Eemoghon lolood ipatajan pani kat malep. Pasa, ighaze patajanani tonenen igham ngar toit ivot, nene pale muri tataghon ngar denja, ve taghita anonja tovene: Itija Maaron pale talup ghiit tanim ee moghon, ve taneep toman lolood luuma.<sup>e</sup>

<sup>12</sup>Yam pida animale tamtoghon to ilaan soso mala, le tapiri isob, ve nima ve aghe ipaspas. Eemoghon apariaanj taumim ve akiskis landoonj le apasobi!<sup>f</sup>

<sup>13</sup>Ve matamim ingal pa ataghon ataam denja to Maaron moghon. Leso apalot nditamim pida to tiyoon arianja sone, ve ghurla todi ivot inim tiina le iyaryaanj. Tovenen apatum gham. Pa vene, ayel pa ataam to Maaron, ve agham di titap le tisami kat.<sup>g</sup>

#### **Tataghon ngar to taan tanimale Esau malep**

<sup>14</sup>Azuaria gham pa apatoonj ngar luuma pa tamtoghon tisob, ve yamja alup gham anim ee moghon. Ve azuaria gham pa ngar patabuanj. Pasa, tamtoghon to ighaze itaghon ngar patabuanj maau, nene irau ighita Ngau Tiina maau.<sup>h</sup>

<sup>15</sup>Yam apatum gham. Pa vene, ngar samia izeev tiam eta, ve ipul muri pa Maaron ve poia toni. Tamtoghon tovene, ye inimale waraman to itub iza ila lolomim. Ye pale iwaghamuni tamtoghon katindi, ve igham di tisami ila Maaron mata.<sup>i</sup>

<sup>16</sup>Ve tiam eta ighur maat malep. Ve eta ipul muri pa Maaron, ve ngar toni iyaryaanj pa mbeb to taan moghon inimale Esau malep. Iit tawatag: Esau, ye ngeu aidaba, ve iza pa igham mbeb naol to tama. Eemoghon igham ngar pa mbeb tonenen maau, ve irabolin iza tonowen pa sur rubruub ee moghon kat.<sup>j</sup>

<sup>17</sup>Ve yam awatag. Muri, Esau ila to tama ve ighasoni arianja ighaze ighur poia to Maaron iza toni. Eemoghon tama izugua. Esau izoorndug pani, ve

---

**d 12:10** 1Pe 1:15+; 2Pe 1:4    **e 12:11** Yems 3:17+    **f 12:12** 2Tim 4:7    **g 12:13** Np 4:26  
**h 12:14** Mt 5:9; Ro 12:18; 2Kor 7:1; 1Pe 1:15+    **i 12:15** Lo 29:18; 2Kor 6:1; Hib 3:12  
**j 12:16** Mbnp 25:29+

itanj tiina. Eemoghon sosor to ye ighami, le ataam eta pa igharaata muul maau.<sup>k</sup>

**Ataam paghu to tala tagharau Maaron ilib pa ataam muḡgina to ivot izi lolooz Sinai**

*(Igham 19:12+, 20:18+)*

<sup>18-19</sup>Aazne, yam anim avot ndug to irau aghita pa matamim ve akisi pa nimamim animale yes Israela ne maau. Muuḡ, sawa to Maaron ivot todi izi lolooz Sinai, yes tighita yab to ighanghan izala lolooz Sinai daba, toman yaghur tae asosooḡa to ikau lolooz tonowen. Ve tighita ndoroom tiina, ndug milia, ve yaghur tiina. Ve tilooḡ mbeb to avolutu inimale tavuur itanj tiina. Ghoru tilooḡ Maaron aliḡa. Tauto matughezaaḡ tiina igham di le tisami kat. Ve titanj roran Mose tighaze isaav pa Maaron, leso isavsaav padi muul sob. <sup>20</sup>Pasa, timatughez pa tutuuḡ ariḡa to Maaron isavia padi ighaze: “Tamtoḡhon ma ḡgai eta ighaze itut lolooz pughu, yam arabi pa yaam le imaat.” <sup>21</sup>Mose ighita mbeb naol tonowen, le ye paam imatughez kat, ve isaav ighaze: “Matughezaaḡ igham ghou le tinig irur kat!”

<sup>22</sup>Eemoghon yam, aazne anim avot ndug tovene maau. Kriḡ igham gham anim avot lolooz Zion wa. Nene Yerusalem to sambam, ndug tiina to Maaron mata yaryaara. Aḡela ndiḡndiḡ ndiḡndiḡ tiluplup di tonowe toman tinidi iza.<sup>l</sup>

<sup>23</sup>Ve yam aneep ila lupuuḡ to Maaron ndinatu aidaba.<sup>m</sup>

Tamtoghon tisob to tineep ila lupuuḡ tonene, yes tinim ndug sambam tamtoḡhona. Tauto izadi ineep ila rau to ndug tonowen. Ve aazne, yam agharau Maaron wa. Ye ḡgeu to pale iḡgabiiz tamtoḡhon tisob ve ighur atia padi. Ve anim avot to ndiran denjadi to aazne tineep izi ndug sambam. Ndiran tonowen, Maaron igham ḡgar todi isob poiawaat ila ye mata.<sup>n</sup>

<sup>24</sup>Ve aazne, anim avot to Yesu. Ye to iyoon bodbodaḡ pa Maaron ve iit tamtoḡhon, ve igharaat ataam paghu, leso itiḡa Maaron talup ghiit tanim ee moghon. Siḡ toni, tauto ipariaḡ saveeḡ mbuaḡ to ataam paghu tonowen. Tovenen siḡ toni ilib pa siḡ to Abel. Pasa, Abel siḡ toni ipoipoi Maaron ighaze iyati. Eemoghon siḡ to Kriḡ, nene ipoipoi Maaron ighaze ireu sosor toit.<sup>o</sup>

**Tapoon taliḡaad pa Maaron aliḡa malep**

<sup>25</sup>Alooḡ. Aazne, Maaron tau isavsaav pait. Tovenen apoon taliḡamim ve azoor saveeḡ toni malep. Aghita. Yes Israela to muuḡ tipoon taliḡadi

---

k 12:17 Mbnp 27:30+ l 12:22 Ga 4:26; Pil 3:20; Syg 21:2 m 12:23 Saveeḡ tonene, nene saveeḡ palelaaḡ. Pasa, iit to taghur ila to Kriḡ ne tanim Maaron ndinatu aidaba kat maau. Yes moghon, ghoru Maaron Natu aidaba kat. Eemoghon ye pale ipakur ghiit ve igham leed mbeb popoia katindi, inimale tamtoḡhon tighamgham pa ndinatudi aidaba. n 12:23 Lu 10:20 o 12:24 Mbnp 4:10+; 1Tim 2:5; Hib 8:6, 9:15+

pa Maaron aliņa ne, irau tipaghau taudi pa mbalmbali toni? Maau. Eemoghon sawa tonenen, ye ivotia aliņa padi izi taan. Ve aazne, Yesu ineep izi sambam ve isavsaav pait. Tovenen ighaze taghur muriid pani, pale tapaghau tauud pa mbalmbali toni vena? Maau le maau kat!<sup>p</sup>  
<sup>26</sup>Sawa to Maaron isavsaav pa yes Israela, aliņa itok taan le katia, inimale yongyoog. Ve aazne, ye imbua saveen ighaze:

“Muri, you pale natok taan pa ee moghon, ve isob.

Ve tonene moghon maau. Pale natok sambam paronjania paam.”<sup>q</sup>

<sup>27</sup>Saveen waaro to isaav ighaze ye pale itok taan “pa ee moghon ve isob” nene ngara tovene: Maaron pale itok mbep tisob to ye ighur di. Leso mbep to arianjadi maau, timbiriis ve tilaledi, ve mbep arianjadi to irau katia maau ne, moghon to tineep.<sup>r</sup>

<sup>28</sup>Pooz to Maaron toman ndug toni, nene mbep arianjadi. Irau katia maau, ve tineep tovene irau sawa isob. Tovenen iit to ye igham ghiit taneep ila pooz toni lolo ve izaad pa taloon tala ndug toni ne, irau tapatoon lolood poia ila pani, ve taroron pani. Leso sunuun toman mbesoon toit itaghon ye lolo.<sup>s</sup>

<sup>29</sup>Pasa, Maaron toit, ye patabuan kat.

Ye inimale yab to moghon moghon ighanghan.<sup>t</sup>

### Ataam to tataghon Krisi

**13** <sup>1</sup>Ngar to taghur lolood pa tonvetaz to Krisi, yam apuli malep. Akiskisi.<sup>u</sup>

<sup>2</sup>Ve ighaze loomba tilat, agham di tila ruum tiam toman lolomim poia, ve angin poian di. Ngarg tovene, lolomim imaagh pani malep. Pasa muun, tamtoghon pida tigham yes loomba ve tighaze pa yes tamtoghon sorok. Eemoghon maau. Yes to tigham di tila ruum todi, nene yes anjela.<sup>v</sup>

<sup>3</sup>Ve matamim ingal Maaron tamtoghon toni to tineep ila ruum to yabyabuun lolo. Agham ngarg inimale yam anepneep toman di tonowe. Ve matamim ingal yes to tamtoghon tigham samin di. Agham ngarg pa patajani todi tonowen inimale yabyabuun igham gham paam, ve auul di.<sup>w</sup>

<sup>4</sup>Yam asob irau aghita ngarg to vaiuun inimale mbep tiina, ve matamim ingal taumim ndizwamim, ve anep toman di moghon. Leso asami ila Maaron mata sob. Iit tawatag: Yes to matadi samia tinimale ngavuun, ve yes to tighurghur maat, Maaron pale ighur atia padi.<sup>x</sup>

<sup>5</sup>Ve lolomim igham pa yaam malep. Ighaze lemim ris, nene iraua. Pasa, Maaron tau isaav ighaze:

p 12:25 Hib 1:2, 2:1+, 10:26+ q 12:26 Igham 19:18; Hag 2:6 r 12:27 2Pe 3:10; 1Yo 2:17; Syg 21:1 s 12:28 Pil 2:12 t 12:29 Igham 24:17; Lo 4:24;  
 2Tes 1:7 u 13:1 Yo 13:34+; Ro 12:10; 1Pe 1:22 v 13:2 Mbnp 18:1+; Ro 12:13; 1Pe 4:9  
 w 13:3 Mt 25:36; Ro 12:15; 1Kor 12:26; Hib 10:34 x 13:4 1Kor 6:9+; Syg 22:15

“You irau napul ghom, ma naghur murig payom ne maau.”<sup>y</sup>

<sup>6</sup>Tovenen iit tamatughez malep. Taghur ila to Maaron ariana, ve tasaav taghaze:

“Ŋgeu Tiina, ye Ulaana tiou.

Irau namatughez pa mbep eta maau.

Pale tamtoghon tigham sa payou?”<sup>z</sup>

<sup>7</sup>Matamim ingal yes to timuun payam ve tivotia Maaron aliŋa payam. Matamim kisin nŋar poia to tighamghami ne anoŋa toni, ve ataghon katin di pa ghurla todi.<sup>a</sup>

<sup>8</sup>Pasa, Yesu Krisi, ye itortoor nŋar toni maau. Muun, aazne, ve muri paam, nŋar toni inepneep tovene irau sawa isob.<sup>b</sup>

<sup>9</sup>Tovenen saveeŋ soroksorok to iyel pa saveeŋ to Maaron, nene iweu gham ve apul ataam toni malep. Onoon, ndiran pida tizuarua di taghaze le titaghon katin tutuun naol to iŋarua aniiŋ ve mbep pida. Eemoghon nŋar to tighamghami, iuul di rita maau. Tagham tapiriid ila poia to Maaron, ghoru poia.<sup>c</sup>

<sup>10</sup>Iit leed artaal eez inepneep. Eemoghon ndiran to watoonrau to timbesmbees pa Maaron iloŋ ila mbeez patabuan to yes Yuda, yes ledi izadi pa tighan aniiŋ to inep ila artaal toit tonowen maau. <sup>11</sup>Aghita. Ndaman to naol, ighaze sawa tiina to rewaan sotor ivot, nene daba to watoonrau igham siŋ to nŋai, ve iloŋ ila mbeez lolo to patabuan kat, ve igham watoonrau pa ireu sotor to tamtoghon. Eemoghon nŋai anoŋadi, nene tigham di tila sagan pa ndug todi to nepoon, ghoru tighur di tizala yab ighan di. <sup>12</sup>Pughu tonene to Yesu paam, tighami tivot tila sagan pa ndug tiina Yerusalem, ghoru tirabi imaat toman yabyabuun tiina. Nene ataam to Maaron itaghoni, lesu siŋ to Yesu ireu sotor to iit tamtoghon, ve igham ghiit tanim tamtoghon toni patabuan.<sup>d</sup>

<sup>13</sup>Tovenen iit paam irau tapul lupuun to yes to tizurun Krisi, ve tavot tala toni. Ve ighaze tipamayanŋin ghiit inimale muun tigham pani, nene poia. Sa pataŋani to tigham pait, tambaada moghon.<sup>e</sup>

<sup>14</sup>Pasa, iit tawatag: Taan tonene, iit leed ndug tiina eta to iit irau taneep pani itaghoni taghoni gha ila ne maau. Nene tazuarua ghiit pa Maaron ndug toni. Ndug tonowen, muri pale ivot ighazoŋ.<sup>f</sup>

<sup>15</sup>Tovenen iit tapait Maaron ila Yesu iza. Onoon kat, iit to taghur ila to Yesu ve tavotia iza ne, avood pale ipait Maaron irau sawa isob. Nene inim watoonrau toit ila pani.<sup>g</sup>

---

y 13:5 Mt 6:25+; Pil 4:11+; 1Tim 6:6+ z 13:6 Mbo 56:4, 118:6; Ro 8:31+ a 13:7 1Kor 11:1; 1Tes 1:6+; Hib 6:12 b 13:8 Mbo 102:27+; Mal 3:6; Yems 1:17 c 13:9 Ro 14:17; Ep 4:14; Kol 2:4,16+ d 13:12 Mt 21:39; Yo 19:17+ e 13:13 Lu 9:23; Hib 11:26, 12:2; 1Pe 4:14 f 13:14 Pil 3:20; Hib 11:10+, 12:22 g 13:15 Mbo 69:30+; Ep 5:20; 1Pe 2:5



<sup>16</sup>Ve agham poian tamtoghon ve arei mbeb tiam padi. Įgar tovene, lolomim imaagh pani malep. Pasa, nene watoonrau ite to igham Maaron lolo poia.<sup>h</sup>

<sup>17</sup>Aloon ŋginiija tiam aliŋadi ve aneep ila sambadi. Pasa, yes to matadi payam ve tipatoot gham pa nepoon to anunumim. Ve muri, yes pale tiyoon ila Maaron mata, ve tipaesia uraat todi pani. Tovenen yam aloon saveeŋ todi. Leso tigham uraat todi toman lolodi poia. Ighaze moghon moghon aghamgham pataŋani padi, nene irau uraat todi iuul gham kat maau.<sup>i</sup>

<sup>18</sup>Nighason gham nighaze aghur ghei ila sunjuuŋ tiam. Onoon, yei niyamaan taumai nighaze ŋgar tiei, nene ingalaan ila Maaron mata. Eemoghon apul sunjuuŋ payei malep. Pasa, nighaze ŋgar tiei isob poia ve denja moghon ila Maaron mata.<sup>j</sup>

<sup>19</sup>Ve mbeb ite to lolog pani kat, nene naghaze yam asuŋ Maaron ariana, lesu iuul ghou ve rikia natal naghita gham muul.

### Saveeŋ palotiin

<sup>20-21</sup> Tiina toit Yesu Kresi to imaat ve Maaron ipamundigini pa mateeŋ, ye to ŋginiin to sipsip, ve iza tiina kat.

Siŋ toni imaliŋ, tauto ipariaan saveeŋ mbuaan to ataam paghu to itija Maaron talup ghiit tanim ee moghon.

Ataam tonowen pale ineeŋ tovene itaghoni taghoni gha ila.<sup>k</sup>

Ve Tama Maaron to igham ghiit taneep poia toman lolood luuma, ye pale irei ŋgar popoia naol payam, lesu yam irau ataghon lolo.

Ve ila uraat to Yesu Kresi, ye pale ipamundigin gham, lesu agham ŋgar popoia moghon ila mata.

Tovenen iit irau tapait iza itaghoni taghoni gha ila. Onoon.<sup>l</sup>

### Paesiin pida

<sup>22</sup>Yam toŋvetaz, you nambood saveeŋ tuku ila rau tonene pa napalot gham. Ve naghason gham naghaze aghur taliŋamim pani pooi. Ayasiil malep. <sup>23</sup>You napaes payam pa itaad ite Timoti. Ye, tipuli ivot pa ruum to yabyabuŋ wa. Ve ighaze inim ivot rikia, nene pale yeru nilat nighita gham.

<sup>24</sup>Agham ndag poia tiei pa ŋginiija tiam, ve Maaron tamtoghon toni patabuaŋa tisob to tineep izi tonanan. Yes to Itali to yeiŋa ninepneep ne, ndag poia todi ilat payam paam.

<sup>25</sup>Poia to Maaron iza to yam asob. Onoon.

---

**h 13:16** Ro 12:13; Pil 4:18    **i 13:17** 1Tes 5:12+; 1Tim 5:17    **j 13:18** Mbaŋ 24:16; Ro 15:30; 1Tes 5:25    **k 13:20-21** Yo 10:11; Hib 9:15+; 1Pe 2:25, 5:4    **l 13:20-21** Pil 2:13; 2Tes 2:16+